

四明談助目錄

第七本南城一

卷十五

四明錫山脈 錫山脈進南城以下歷叙南城古蹟

慶雲樓述 聞志附 新按 大坂田述 湖語

碧泚水仙廟述 聞志錄 張雪窻紀德碑鮎埼亭集碑記

桃花隄錄 薛蛟川全謝山二記并 勾餘土音詩

西水關古迹附 新按 湖市附 新按述 湖語并 陳公顛詩

夏孝子業漁述 嘉靖志 湖西洋山述 聞志 成化志

五顯靈順廟述 聞志附 新按

蔣翰林第附 新按列 孝子九華 知縣良弼 翰林拭之并

四明談助

卷十五

逸事 知縣學鏡 孝廉學鏞諸傳

范氏西園附 新按 聞主事塞河述 敬止錄簡要志

王參政第述 聞志錄 族望表列 參政次翁侍御伯庠二傳

義田莊述 敬止錄寶慶志

趙尙書第述 族望表列 訓導龍尙書參魯明經嗣賢嗣贊知

縣嗣萬諸傳別錄 御史吳附 逸事并 觀察世祿傳

社南李氏述 李氏宗譜列 處士訥 太學綺 文學坤元

徵君士模 學博如玉 明經開諸傳

月湖述 寶慶志錄 舒嬾堂西湖記畧 王巨十洲倡和詩序

陸石溪月湖行 龍子高月湖四時詩 全謝山日月湖

竹枝詞十六首并 湖語兩段

卷十六

西湖十洲 述 乾道圖經 節錄 西湖十洲志

烟嶼 錄 劉戶部瑄首倡詩 王巨舒直陳瓘和詩 并謝山十

洲志 附新按

嬾堂 述 延祐志 兼 族望表 錄 舒嬾堂直傳 并嬾堂四明雜詩

十首 王穎彥懷嬾堂詩 句餘土音詩 鮎埼亭集記

各一首

邊進士家學 錄 進士恢傳 樓三學士宅 述 月湖丈尺圖

趙學士錦里 錄 湖語 并 族望表 列 資政彥逾知州箴夫傳

史春坊宅 徐運使宅 楊侍郎宅 俱採 月湖丈尺圖

西湖陸氏 採 鮎埼亭集 錄 族望表 附新按

四明談助

卷六

目一

陸尚書第 述 聞志 錄 尚書瑜傳 并 逸事畫像記副使健傳

陸中丞第 陸榜眼第 俱述 聞志 列 宣義儼 副使偁 都

御史鈞 布政銓 副使欽 通判繼魁 遺老觀諸傳

陸給諫第 述 聞志 附新按 列 贈公涵 參政懋龍 舍人寶

行人符 并 詩集序 桂井詩 翰林泰 孝廉山輝諸傳

陸廷尉第 述 聞志 列 太僕大漳 大理世科 都事宇燿

節介字燿 披雲字燿 并 詩集序 知州經正 明經盞

諸傳 附別業不波航記

陸孝子廬 錄 淳古介祉 節孝崑 隱君峻諸傳 附記 汝社

方子留寓樓 余生生借鑑樓 述 全謝山記 并 句餘土音詩

宗徵士宅 錄 徵君誥傳 附 詩四首 列 門下范梧范核二傳

觀日堂詩社附蛟川范兆芝傳并勾餘土音詩

宋菊齋寓樓述全謝山記又採張茂滋餘生錄跋并詩

尚書橋述敬止錄 尚書坊附新按

聖功寺述寶慶志聞志 湖社罷劇採鮎埼亭集記

謝御史第表御史升知縣柔附明經均傳又附吳山人士瑋

湖上全氏述全氏世譜附新按少司空元立 少宗伯天

叙 太學天麟 舍人大訓 公子大震 徵士大和

太常大程 隱君大鏞 美楠 儀部美章 侍御美閑

贈公吾騏 贈公書 翰林祖望諸傳附太常紀事詩十

首 謝山林泉雅會集跋三首 避地記一首 藏書記

二首 句餘土音舊居詩二首末記著述書目

四明談助卷十五

鹹塘滙齋課餘錄

府治主結先詳四明來脈後列入城支派府治朝沙先列入城支派後詳四明來脈城中南北界事物古蹟庶可展卷瞭然大要朝沙之脈自西四明錫山來從老龍灣南首進城皆自西過東其第一重沿城兩分南至南水關河止北至西水關河止爲諸朝沙右托與小溪烏山脈南來至永寧橋度河兩分之左托配第二重自大坂田起北行至三版橋河止第三重從大坂田過東至觀基北行抵碧沚後河止第四重從觀基再過東至王家墩北行抵寶奎里平橋河止第五重從王家墩再過東至冷靜街轉北過河抵平橋河止此沙正朝府治最闊大第六重從冷靜街東北角過龍舌尖北行漸闊

四明談助

卷十五

西至市心橋河東至蕭家橋河止第七重從冷靜街正東過大河頭分支向南結延慶寺正脈北行至東門內大河止此爲朝沙盡處亦最闊大計錫山脈自西南方入城爲托沙者一爲朝沙者六茲錄自西過東所歷之古蹟事物詩歌於後至再東則爲諸朝沙之左托其脈自東四明烏山來至永寧橋過河西至南水關東至羊廟浦其詳見於二十八二十九

卷

慶雲樓

在西城之第九鋪附城築石臺建樓其上爲層者三鳴鐘於中妥神於下明崇禎十四年海道副使羅浮王應華從異人伍柳園之言建此以補形勝而厭劫災公自爲之記先是庚

發波間如叢炬後紅燄飛動下見龍之首甚大不違顏咫尺
大復現小復現全體鱗甲燦燦有光久不沒陰風颯然見者
魄變神動已而前二蜥蜴躍起注視尉若送歸者兩旁香火
老僧皆合爪歎未有丐上其事七月新建祠拜神之休不忘
良臣謂惟我敷學內自色養外以事君庇民無不誠惟誠故
能幽通萬物之情龍宜有知者也故公命之不愆期而雨施
轉耗斲之憂爲豐年之慶新祠是營以妥神娛於惟休哉方
尉之視其事盡勤又圖有言以見之良臣不肖實拜其辱今
姑志祠之所從事以刻諸其側尚俾來者有攷

碧池龍祠碑記 鮎埼亭集

明道先生行狀云上元之茅山有龍池其龍如蜥蜴而五色

祥符間命中使取二龍至中途中使奏一龍飛空而去自昔
嚴奉以爲神物先生嘗捕而脯之使人不惑及朱文公之高
弟滕達道爲鄞尉文公嘗叩以天井山五龍靈蹟之果否則
文公亦疑之而未敢遽以爲妄若呂忠公來鄞力詆阿育王
山龍井之誕蓋大程子之緒言也愚者唐白香山新樂府黑
龍潭詩極言祀龍之謬已出大程子之先雖然龍之爲靈昭
昭也作雲施雨則固矣夫感天和恤民隱苟實有如成湯者
豈畏乎魃亦豈藉乎龍然有中和位育之功則盡人性以盡
物性不祥之魃退聽而至靈之龍效命正不必謂其無也不
然則古人雩禱之禮皆可廢而詩所云靡神不舉者不亦謬
耶特愚民惑于此而妄以邀福則有如白傅之所譏者或曰

然則其得取而脯之者何耶曰天下無不靈之龍而未嘗不爲人所參故亦未嘗不爲人所醢古有之矣然因此而謂龍之非靈則不可也卽以吾鄉天井之龍言之有求于山者或得蛇或得蜥蜴或得蛙皆能有驗顧前明太守林夢官祈得蛙不雨手刃之而雨是殆卽變置社稷之說而究之得雨則未可謂其竟于旱潦無豫也碧沚龍祠卽阿育王山龍神之行館浮屠以爲護塔之神此妄言也若其靈之著足以庇民則見于舊碑多矣顧予家在祠左每入祠見座中衣冠像設殊爲不根天下亦豈有龍而人者乎乃與里社諸公議以木主代之而爲之銘

桃花隄

四明談助

卷十五

四

全宮詹天叙歸里自新街舊第徙宅湖上買得竹州一曲以爲別墅又築石堤抵長春門樹桃於上游人呼之爲桃花堤鄞南城桃花堤碑記

鄞城中以日月兩湖爭勝而月湖佳麗過於日湖南北七橋以通往來直抵城下而止宋時有長堤二其一曰偃月錢使君公輔所築王益柔詩所云偃月堤成車馬道湖光如截天如抱者也在紅蓮閣下當時置酒務於湖之北乃堤湖之北畜清流以爲釀泉卽今碧沚之北是也其一曰廣生元祐中鄞令虞大寧所築在壽聖院前以放生卽今湖心寺橋之前是也兩隄已久不存矣大宮詹全公自鶴禁歸構別業于水仙宮畔之竹洲卽宋時史忠定王真隱道觀之故基而近爲

晏公廟者也宮詹相度流泉謂竹洲之陽城下隙地直至長
春水門可雜植花木以增竹洲之景因築石作堤履道坦然
堤之內雉堞參差其蔭足休息不見日影堤之外湖光清泚
畫船簫鼓出沒花木間宮詹與同社周大宗伯徐大廷尉萬
施兩大將軍時時緩步其間宮詹詩曰偃月遺踪擬白沙廣
生堂畔列仙家湖光今日重生色幾許詞人攬暮霞亦風流
盛事也堤上之植無所不有而天桃爲最屠辰州田叔因錫
以名曰桃花堤屬予爲記予不敢辭萬歷壬子蛟川同年生
吏部侍郎薛三省

桃花堤記

鮎埼亭集外編

西湖佳麗過於南湖南北四橋以通往來至城下而止當兩

四明談助

卷五

五

宋時有長堤二一日偃月錢使君公輔所築王集賢益柔詩
曰偃月隄成車馬道湖光如截天如抱而荆公亦有載沙築
路之句取杭西湖白沙故事也在紅蓮閣下以今地望攷之
碧沚之後是也其一曰廣生元祐間築隄以爲放生池在壽
聖院南其後趙使君伯圭築堂其上以今地望攷之湖心寺
橋之前是也有明以來二隄之遺蹟不可復攷先宮詹自鶴
禁歸徙宅湖上買得竹洲一曲以爲別墅舊時史忠定真隱
觀也後爲陸康僖祠至是歸於吾家構平淡齋於洲東構菘
窻於洲南宮詹謂城下尚有閒田可修治爲花隄以助竹洲
之勝乃自水仙宮前築石堤直抵長春門履道坦然而藝千
樹桃於其上隄之內雉堞參差茶竈琴床錯列其下以花爲

藩堤之外湖光清泚畫船簫鼓時時過之以花爲幕宮詹與
林下諸公結社時緩步焉嘗爲詩記之曰偃月風流擬白沙
廣生樂育更誰家是也湖上游人因呼之曰桃花堤別墅未
落宮詹下世陸先輩公明有園面隄復修治焉二十年後兵
火紛然湖之上高門縣簿盡爲摧落沿城上下皆成馬牧而
堤又廢予追隨家君子遊湖上嘗指示曰此白石鑿鑿者雖
大半殘缺然吾家故物也予退考之宮詹墓碑信然乃別爲
記而存之荒城落日水色依然而錢趙兩使君之甘棠吾先
人之喬木莫有過而問者良可感也
勾餘土音桃花堤

詩話先宮詹築城南堤樹千桃焉因營別業于真隱觀以

四明談助

卷五

六

復洞天之勝

隄上千桃樹風流擬白沙絕流簫鼓過負郭畫船譁烟景二
分占風光三月嘉攻魏集中自從真隱後未覩此清華

湖西城下窟

馬牙漕底城下有一窟長約三四丈闊約三四尺石礪堅緻
其水清冽無比或云此係舊日西水關古蹟未審其實

湖市

宋湖市在觀音寺後隔河城下今前營教場卽其地

湖語云湖中物產充牣城隅其負城爲鬧市集百貨以兼車

宋之湖市在觀音禪寺後今舍基背晨屐所至不時可需如菱如芡如蓴如菰

葱葱青青以備晨蔬

宋時湖濱居民各植菱蓴之屬見嬾堂西湖記中今無

而且有鯽

縹青有蝦粹白其柔成脂其長徑尺彼舉底之人鱠鮓充斥
湖上漁人當夫櫂歌羣和秧歌間作酒戶張帘漁戶四逐新
昔居舉底月生斜陽落泛中流聽評泊雜披土物正復不惡味嘗其新
賈喜其薄夫非賞心之樂事耶

陳公額 民俊湖上竹枝詞

踏青釀解杖頭錢細草新隄可醉眠舉底漁家閒曬網不知
何處有湖鮮

湖邊負郭水田多春雨農家一笠蓑夜靜試憑高處聽最銷

魂是唱山歌 湖南大坂田

夏孝子業漁養親

夏道昌月湖漁人也幼孤惟母教是聽所得魚擡巨者奉母

四明談助

卷五

餘以資薪米母得膚癢疾每發于申時須沃沸湯以解孝子
歸供湯沐無失候者遇報賽令節必奉母出遊母倦行則負
以往偶不愜意母齧其背卽長跪祈請怒解復負之行一日
于新莊之河漁得巨鯉土人多與之直堅勿與怒而相毆一
老者怪問其故曰歸以進母表尚寶忠徹聞而敬禮之歲時
設酒饌躬執爵以燕勞之有詔錫民孝弟力田者粟帛以母
沒力辭弗受 嘉靖志

湖西洋山

銀鉞魚出月湖應海鱉而起俗呼爲湖西洋山魚 聞志玉筋魚
出月湖見成化志

五顯靈順廟

舊志俱載廟在月湖之西神舊在徽州宋開禧間鄉人徐侍郎迎歸立廟祀之聞志廟左即河有徐侍郎橋過橋爲雪汀此河自教場前來至廟後轉西經蔣翰林第前出馬牙漕今已侵爲溝渠不久即湮沒矣

蔣翰林第

在五顯廟右翰林蔣蓼厓先生爲宋給事中邦彥之後明初自諸暨遷鄞世爲清門孝子九華循吏良弼其近祖也
蔣孝子九華

字丹逸號漁澳博通經史爲名諸生性至孝父得危疾醫言不可治因對天泣顙割臂肉和他藥以進旋愈居恒晨夕侍奉無不先意承指當事表其閭曰孝子之門父沒後

四明談助

卷五

八

始授徒外郡歲暮歸宿逆旅得白金一篋私念必前客所遺留待之踰旬而至問其銖兩封識皆合舉以還之子良弼時在家尚幼夢一白鬚翁摩其頂曰汝父陰行善加汝貴骨因驚寤額上果一骨隱起後良弼登陝西賢書知建德爲循良吏聞志

知建德縣蔣公良弼

字巖臣號警菴少奇穎績學工詩文久躋場屋占籍陝西遂舉鄉試謁選得建德令訟者投牒即呼至榻前相語如家人徐論曲直皆中窾綮久之民相戒不忍欺乞終養歸

杜門不交貴要年八十六卒聞志

翰林蔣蓼厓先生拭之

字季眉別號蓼厓自父以上三世皆諸生父早世先生祇四歲家窶甚時祖猶在堂性善飲嗜魚鱉肉鸞母陳孺人竭蹶供饋如常時一日命先生侍膳樓上祖忽不樂數輟飲浩歎先生走告母母親爲勸餐祖強慰之酒淬唇輒止母召先生詢所由起先生曰頃方就案偶憑檻下視卽變色咄嗟母復上樓就所憑處視之則伯祖方晨餐惟糲飯菜羹蓋祖念其子不能具甘旨而吾婦方發屠力作以供欲推食而難于發言母會其意卽啓曰邀伯翁同飲何如祖大喜連曰孝哉婦孝哉婦伯祖至兄弟歡然對酌盡數斗至暮而散後祖沒陳孺人以冢婦力營喪葬家復遭火朝夕所需皆從十指出先生年二十爲童子師始能具二

誦研摩經史學益進所作舉業文輒冠其軍因戲爲人代遂以此獲譴于學使者曲阜顏公然顏公惜其才雖以功令褫巾服而次年又召之試復冠其軍先生遂以此愈得名康熙五十六年舉賢書幾二十年始成進士選入庶常散館歸班補外遂不復仕先生少美丰姿隣婦挑以微言遽返走不復經其門乾隆元年先生年已六十有七絕意進取會前一歲巡道王公坦延之署中其子將北赴秋闈固請偕行因留京與試大學士朱可亭軾枉車騎過邸舍以病辭是科朱與首揆鄂公泰爾少宰邵公基同主文衡朱于闈中得一卷曰此必蔣某文也拆名果然謁謝日朱語之曰吾以至公得子今相見兩無媿矣旣左遷所親或咎

之歎曰吾猶老寡婦也使肯破戒豈待垂暮始博一第哉
先生性至孝侍母病自藥餌以至廁牕無不身親寡孀無
子事之與所生同羣從兄弟友愛一體友朋患難傾束修
所入以助之故授徒幾五十年歿之日諸子無以爲歛

表

先生於友誼最篤每歲暮自館中還必立一冊列其目于
下細書銖兩酌疎密緩急爲分贈之差貯一篋中諸友聞
先生至先後集各贈如所列之目或篋中金尙未盡將出
門有所詣孺人笑曰必不達果中途遇友人與俱歸金盡
乃止歲以爲常

行

知龍南縣蔣公學鏡

四明談助

卷五

十

字用照一字娥婪蓼厓先生之叔子幼奇穎九歲能屬文
年二十三中甲子鄉榜越十年甲戌成進士謁選得江西
龍南令公素不習吏事閱案得其要領輒以意斷大吏或
以文法相拘公自爲申文反覆數百言不爲奪浸積忤龍
南固瘖縣俸入不足于用厨傳蕭然大吏每需索不應益
心憾之巡撫阿思哈謂太守朱展曰是人三寸管勝百淬
刃吾不去彼彼且將許我因令日伺公過公固好強酒嘗
詣郡同僚招飲沃以巨觴公不勝酒力輿歸寓醉墮寓門
外然其事已三年矣展何無所得卽以前事上報遂罷歸
歸而貧甚不能給朝夕晚嘗主月湖書院講席脩脯頗豐
戚友求請無虛日雖不相知者介所知以丐亦立應旣徹

席貧如故爲詩文筆不停綴皆粲然可觀願好葉子戲連
日夜不止嘗有持卷求賦長歌者立以俟公與客正鬪葉
子客求罷不許但時時見其額微蹙及局竟命展卷則四
十韻已就矣見人無款曲遇要人矜體貌者必以氣陵之
紳士有公會飲必醉醉必罵其座人醒後不復記憶人知
公坦率無他腸受罵者亦不甚怨也

家傳

孝廉蔣樗菴先生學鏞

字聲始一字樗菴蓼厓先生之季子中乾隆辛卯鄉榜吾
鄞全庶常謝山以宏才博學爲一代文獻宗師先生于庶
常爲中表弟事之最早精勤刻苦務爲無所不窺而尤粹
于經中年嘗取衛湜禮記集說蒼萃諸家爲之援據考定

其立說不徇宋亦不媚漢要成一家之言爲學官程式已
積成巨軸而心氣悴竭下注兩足心血漉漉出怔忡大發
醫者賦以爲五官必廢其一乃可生旣而兩耳遂廢聽以
至終身時年方四十也其後所著巨軸卒爲當事者取去
先生終身恨之古文好王荆公詩慕柳州東坡尤嚴法度
不肯肆爲馳騁性狷甚遇不可意雖從學之士揮之若仇
先生叔兄娥野進士詩文豪放晚不得志隱于酒以狂著
而先生以狷名學者終以狷爲可宗也

黃真并撰樗菴存稿序

所著

有樗菴詩文稿七卷已刊行鄞志稿若干卷藏於家子漪
字靜甫嘉慶辛巳歲貢次子淙字浣亭能紹家學著詩義
管窺春秋表徵小樗詩草

范氏西園

在司馬第之西背城面河其河本自馬牙槽來北通菱池達社壇橋大河自嘉靖間聞主事塞河後遂為斷港今如大池橫於西園門前池上有洲疊假山古柏陰森頗有幽趣園內前建佛堂後列書屋饒竹木蔬笋康熙間范德化正輅為母奉釋所建至今范氏奉釋者每於此習靜

聞主事塞河

高隱學敬止錄云自西社壇橋歷經閣橋福聚菴右通菱池頭明嘉靖間主事聞源塞簡要志云錦里橋即三版橋在菱池頭本與西水門裡河相通後為主事聞源所塞漸流入其宅內設水關閉之掩為已有今屬兵部侍郎范欽

四明談助

卷十五

王參政第

在西社壇橋南參知政事王次翁所居聞志甬上族望表西河王氏次翁之參政醜矣其子伯庠差可故舍次翁進其子為一望

王參政次翁

字慶曾家濟南崇寧癸未進士通易書詩春秋歷官資政殿學士奉祠引年居鄞著南河集易說春秋旨義元元通數聞志墓在城西清涼山有萬季野竹枝詞錄于清涼山下

王侍御伯庠

字伯禮次翁之子登進士科刻意問學乾道二年擢殿中侍御史沙田蘆場議起租稅侍御極論止之出為夔州安

撫夔路曠遠侍御手圖其險要部人不能欺俗多掠子女
爲貨特嚴其禁工詩文著述有歷山集雲安集宏詞集夔
路圖經等書弟伯序紹興五年進士官宗正丞闕志孫挺慶
元二年進士選舉表

紹興之末蓮峯周貳卿歸自永嘉灑山朱舍人歸自平江
俱以次對來寓四明僧舍侍御王公伯庠年雖未及而從
二公遊完顏亮既平周公賀表用萬馬救中原對一驢載
都市朱公問之侍御適參坐誦臧質傳中數十言二公俱
稱其強記攻瑰集

義田莊

在望京門內南首王參政府之北見寶慶志圖大街南有肅

四明談助

卷五

十三

寶亭亭東巷口有宜秋坊又有迎恩驛迎恩亭自建涵虛館
爲迎送賓客之所驛亭遂廢今爲義田莊屋亦見寶慶志
史忠定王鎮會稽日捐公帑之金市田數百畝名曰義田凡
仕族有親喪不能舉與孤女不能嫁者以其租入差給之既
閒居里閭沈端憲公煥請曰吾鄉義風素著相調相恤不待
富者能之而求者日衆後難繼也舉會稽近典行於此可乎
王韙其言乃與沈及少師汪公暨其子尚書大猷合詞以倡
好事者或贍田或輸財以廣費積田漸多買地作屋十五楹
于郡之望京門扁曰義田莊俾鄉之賢者有力者掌焉仕族
親喪之不能舉者給三十緡孤女之不能婚者給五十緡其
親屬各鄰里以聞于郡郡覈實俾主者行之非二者不與先

後緩急間從權宜而郡守與主者皆不得私焉鄉人繪王及少師汪公端憲沈公之像于莊所祠焉

寶慶志

趙尚書第

西社壇橋刑部尚書趙參魯所居

聞志

甬上族望表菱池趙氏尚書諡端簡參魯一望

懷寧訓導趙贈公龍

字雲從號曰峯端簡公之父四歲而孤奉其祖雲木之訓惟謹性忠慤嗜學飭行爲人師以身示則以貢授懷寧訓導尋受子給事封而歸家庭嚴肅雖燕私必衣冠相接與人交又藹然可親卒年七十有五

聞志

刑部尚書趙端簡公參魯

四明談助

卷五

十四

字宗傳號心堂父訓導龍積學尚篤行人稱爲趙夫子公少從父受經盡得其學先世無他趙于鄞凡家祭畢後享餘惟侍父一席公性篤孝朝夕奉父教甚謹年二十二舉于鄉以進士授庶吉士時江陵枋國嫌公無私謁改戶科給事中闈人張進毆給事申于留都公抗言進乃守脩中官申信之黨不併治信無以服人時信方與司禮馮保比譖于上得旨切責竟坐謫高安典史尋擢福建督學僉事乙卯秋方大校士適得父手書忽心動疑其有疾立投牒竟去及抵家父果臥疾不可起公日侍五藥積歲餘父始歿公竟得心疾里中無不稱公至孝服除遷南太常寺卿擢右副都御史撫閩有陳申者以倭報至言其勢甚張人

情震動公察其狀曰是將勾倭以自爲功耳立械擊之謂倭來卽斬汝已而倭竟不至漳卒譁有司懼其爲變欲勿問公曰廢法以養驕亂之道也縛其魁斬之一軍讐不敢動遷南刑部尚書滿三考遂東歸卒年七十三所著疏草文集藏于家者舊傳子體仁字存劬以父蔭歷官刑部郎中體仁之子琦徵字亦韓有遺詩見于續耆舊集

趙明經嗣賢

字人選一字鶴樵公子琦徵長子也兄弟三人並負詩才而先生得名最早高都御史斗樞深器之晚年以明經貢太學張丈蓉嶼爲秋水之集先生兄弟狎主其盟著有居

鄒草南樓集

續耆舊耆傳

四明談助

卷五

五

趙明經嗣贊

字人憲一字憇菴公子琦徵次子與伯兄嗣賢齊名累獻藝不售以明經貢太學所著鳩巢集岳鳴集秦遊草

續耆舊傳

趙知縣嗣萬

字人年號如園鶴樵少弟三趙才名鼎足如園年輩稍後以康熙丙午舉人知贛榆縣有清節著如園集

續耆舊傳

又御史知瓊州趙氏本不與尚書同族因里第未詳附于此
趙御史昊

字子明嘉靖丙戌進士授行人以諫止世宗遷獻陵忤太后旨杖之四十謫福建布政司照磨遷知瓊州府投劾歸至揚子江舟中忽鏗然有聲公詢其故乃一小銅鈺家僮

偶攜以歸者公大怒曰吾止飲瓊州一杯水容若輩攜此物乎遂投之中流其清介之操始終不易如此詳曹志趙昊守瓊州極其廉潔後家居衣食不充意似稍悔同年孫裕置酒邀之供張極盛酒器盡金玉之美昊大怒傾翻其席相罵而出歸至范東明家見廳事前列酒甕數十取木棍擊碎殆盡及至家已死轎中矣敬止錄

趙觀察世祿

字文叔御史昊之孫由進士任刑部主事議楚藩之獄詞連大帥執法不阿出知蘇州府吏治精敏值歲饑悉心荒政郡民德之尋遷吉安兵備道與鄒南臯郭青螺諸大儒交甚洽江右士翕然宗之未幾掛冠歸曹志

四明談助

卷五

六

萬歷壬子蘓郡侯鄞縣趙世祿錄科試題出康誥曰如保赤子節一書吏某稟曰今日錄科題有不中字請一改易趙然之易夫人不言言必有中後趙信任某吏遂得大用秋榜發郡士得售者三十二人周忠介順昌姚文毅希孟王遵義仲聖沈應明陸康稷熊秉鑑皆是科所取士也明三百年得人之盛未有如是科者白醉瑣言

社南李氏

李氏之先宋名臣禮部尚書育本青州人後徙家于奉化凡八葉進士自奉遷鄞世居社壇橋之北至明宏正間南塘翁始卜宅社南其橋北敝廬今猶稱李氏舊宅南塘李處士訥

字宗厚號南塘舊居社北以孝友世其家至南塘翁始居社南益擅至行伯兄無子依翁以居事之惟謹及卜父塋耐兄于左戒子孫勿替厥祀著有孝經翼註行世聞志

李太學綺

字守華號見橋南塘翁之子積學勵行能世其家生子六人俱爲名諸生惟坤元尤善詩文學者宗焉聞志史立菴大成有見橋先生像贊見李氏宗譜同族願菴愉葛確菴世振有像贊九麓乾元徐九瀛時進有像贊俱見於宗譜

李文學坤元

字公簡見橋之子學者稱爲九隴先生少能傳家學爲名諸生性至孝事父母疾不緩帶居喪哀毀盡禮有兄弟六

人後分居推田讓宅惟兄弟所得始受其餘嘗言爲學在躬行但能不愧俯仰斯足稱儒者里中俱宗之年七十三終于家後人世多賢者耆舊傳

附自述詩一首

兄弟常難得吾家有六人後先惟一母吾汝不分身花月酬良夜琴尊答令辰扶藜偕出入此外復誰親

李徵君士模

字叔範九隴先生三子公其次也與伯兄士楷講習世其家學公十歲失母哀痛逾于成人事父必雞鳴候安五十年如一日父卒營壙西巖深山遂廬墓焉嘗丙夜有虎窺之色不爲動治家嚴而有法五世同居晚爲族祭酒存孤

恤寡恩義尤篤當事屢徵不起卒年八十有六志先生初讀書及兄叔則補諸生有名遂讓兄專治經史而身任經營家益饒既而承父命分產田宅受其下者叔則曰吾家一區一廛並吾弟所益吾當受其下者兄弟相讓不置里中聞其言歎曰李氏兄可為模弟可為楷一時傳為佳話

果堂文鈔

李學博如玉

字敬之號一芻叔範先生長子性至孝侍母疾衣不解帶父常曰汝母于病中得延筭二十餘年者皆汝侍奉力也以康熙二年歲貢授龍泉訓導龍泉當兵燹後士有菜色先生發學租公貯賑給貧生士逢比糧邑令延學師同坐

四明談助

卷五

六

示夏楚威先生必起坐力爭為代輸急公終不以庭撲加也著有大成樂譜泮宮紀畧留榭閣等集三補者舊傳學博公

徙居章耆巷菜園廟左菜園廟者沈相公府菜園之神相府改為提督署遷神于署後章耆巷學博自龍泉寄書歸家猶稱菜園廟左今廟已改為財神殿

李明經開附孺人丁氏

字錫袞一字子寔訓導如玉子也粹然長者以副舉貢太學弟秀字聲遠諸生婦丁孺人名性覺在家事祖母即以孝聞後歸李氏以姑喜嗜雪菜晨起蹈水擷之中寒而卒續耆舊傳子作梅彭齡諸生並有文名同族自新字被齋九麓乾元之後乾隆甲子亞元祖謨字訐傳學博如玉元孫嘉

慶庚申 恩貢

此以下先登月湖總記十洲倡和詩序并雙湖竹枝詞湖語總提後再分記諸勝

月湖

寶慶志云日月二湖皆原於四明山瀡城西南隅南曰日湖西曰月湖二水支派繚繞城市往往家映脩渠人酌清泚

諸勝見二十一卷南城下

舒嬾堂西湖記畧

湖在州城西南隅南隅廢久矣獨西隅存焉今西湖是也其中
有橋二絕湖而過曰憧憧天禧間直閣李侯夷庚之所建也然僻在一隅初無游觀人跡往往不至嘉祐中錢侯君倚

四明談助

卷十五

十九

公輔作而新之橋之東西有廊廊之中有亭曰衆樂而又環亭以爲島嶼植花木于是遂爲州人遊賞之地方春夏時士女相屬鼓歌無虛日亭之南小洲前此有室今遂以爲僧院壽聖是也其西又有佛祠四并其東皆鄉士大夫之所居其北有紅蓮閣閣之北卽郡酒務然是湖本末圖誌所不載其經始之人與其歲月皆莫得而攷蓋嘗聞之父老明爲州瀕江而帶海其水畜瀦而易旱稍不雨居民至飲江水是湖之作所以南引它山之水畜以備旱歲始未之信也熙寧中歲大旱闔郡取給于其中湖爲之竭旣又穴爲井置廬以守之鄞令虞君大寧嘗記其事刻石于壽聖院乃知父老之傳不誣也錢侯去距今幾三紀而湖輒浸廢不治其亭南旣隄以

爲放生池瀕湖之民人緣堤以植菱芡之類至占以爲田淀
淤蕪沒幾不可容舟元祐癸酉劉侯純父淑來守是邦適歲
小旱乃一切禁止而疏浚之增卑培薄環植松柳復因其積
土廣爲十洲而做壽聖之閣以其名名之蓋四明之景物具
焉湖遂大治全篇載
聞志

王巨十洲倡和詩序

太守劉戶部乘水涸時浚治陜塞因其餘力補葺廢墜而湖
上之景爲之一新島嶼凡九作一成十隨景命名遂有十洲
之詠倡和詩分
載于後

考題名記元祐間劉淑以戶部郎守明州紹聖年劉埕亦
戶部繼守是邦相距不數載蓋浚湖作洲肇于淑而成于

四明談助

卷五

二十

埕舒亶西湖記中所稱劉戶部謂淑王巨十洲詩序中所
稱劉戶部謂埕也聞志四明十洲倡和之王巨係北宋元祐

間人但不知里居官爵若南宋乾道間之王巨乃閩人嘗
仕于粵之南恩州故粵中亦有其詩宋詩紀事誤全謝山
答厲樊

樹
語

陸石溪月湖行

我家住在湖之西中有島嶼湖之湄東風三月桃花水清陰
百丈楊柳堤寶塔浮雲聳高漢石橋流水飛雙霓高漢雙霓
西復東往來人影綠光中狂客祠前朝酬酒夢公堂裏夜聞
鐘風起沙驚鳧瀾亂雨來聲滿荻蒲叢何家公子好游狹木
蘭爲船桂爲楫輕篷細槳蕩中流翠鈿寶髻嬌雙頰清歌一

曲白雲飛朱顏百媚紅葉落湖前湖後何繽紛橋上人看湖
上人行人但識湖船樂遊人更羨湖光新夾岸人家門第改
惟餘明月湖心在露華曉候漁舟出星光暮入水亭待亭上
主人久不歸湖光月影徒輝輝

龍子高月湖四時詞

畫船載酒及春晴瀲灩波光碧玉城橋外綠楊誰繫馬水晶
宮裡管絃聲

槐陰屯午咽新蟬一枕南熏暑不前隔岸荷花新雨後白鷗
點破鏡中天

松寺聯陰晚更幽天光倒浸玉壺秋蓼汀棲雁忽驚起一曲
漁歌月滿舟

四明談助

卷五

三

平湖雪壓小橋低萬里乾坤眼欲迷誰泛扁舟深夜過却疑
人在剡溪西

全謝山日月湖竹枝詞

儂家日月湖頭住題過楊枝又橘枝慚愧慶府新樂封教誰

傳徧冶春詞

宋慶封樓在
官酒務中

廣生堤放唱溪娃大坂秧田曲子嘉驀地清風送別譜一聲
聲是浪淘沙

西湖曲皆
淘沙戶

春晚洋山魚計盈滿湖小種亦神清郎船夜傍竹洲宿天半
天封塔火明

洋山魚期至湖上亦
有小種魚名銀鉞

聖功寺北報鯨鐘西岸蟬連四佛宮

謂聖功寺能仁觀音
寺感聖寺崇教寺郎

若更尋寶雲去禁聲維衛尚居東

楊家孤子女兒裝碧海青天怨未降閒向亮公唐開元五乞

神懺長明燈下薦翁娘

初元夾岸麗人行莫是袁家女飯僧若到更深休戀戀湖心

怕遇牡丹燈湖心寺舊為袁宗正公女道場

長日划船爛綺霞鍾家渡過又黃家南胡為鍾黃二家競渡之地即今底

事浪遊去待放萋蒲九節花西湖產萋蒲見張白齋詩

東樓萬卷架渠渠知是樓三學士書宣獻公當時稱為樓三學士其東樓書史最多

郎若不辭勤汲古汲古堂王厚齋書庫一甌妾願供雙魚甌上名酒

再登雙湖竹枝詞

雙湖清景是神臯綠野芳塘繞七橋何處登臨都在望舒官

人巷露臺高舒官人巷即嬾堂中有露臺

四明談助

卷十五

廣靈王廟鬱葱葱中有水仙嬌女宮不道神仙猶薄倖糟糠

棄去別乘龍予嘗謂廣靈王靈跡之誕此詩可悟其一

東藩驛館近儂家宋高麗驛館即今寶奎廟白雪青唇驛中唱和詩篇唱和佳便

扇東人新摺扇捧花橋上去看花

異姓王開千步廊大觀文府霸湖光何來梧竹清風別碧汜

深居十二郎能仁觀音寺歸史衛王稱大觀文府

萬金樓迴藥籠多馮氏施藥之地聞道王仙謂王可交載酒過那得乞來

郎服食玉醅甬上進貢之酒長護玉顏醜

新紗織就過吳綾唐宋貢物緩帶橋東百練輕在西湖為練帛地尚有弓

衣為郎貯烏絲且待權歌成

天王天女影濃纖問疾維摩壁上粘開元寺中壁上所畫諸相再向挽花

西滙過

湖上有二滙晚花南滙在南湖其在西湖者曰西滙

湧波穿石有神髯

國寧寺僧某善

畫龍有湧波穿石諸圖

滄洲閣外水茫茫

在壽聖院

玉筋魚羹足侑觴

玉筋乃小魚而味甚美故成化志亦

載之儂便作歌誰與和空教吳語獨清狂

湖語循城而右豁我目睛環四橋為南北其圍則七百三十

一丈而羸其為水也望之溶溶即之泠泠紆餘為曲墳埴為

汀長空綿渺寒烟時生平鋪鴨綠澹拖水晶以烹十二雷之

茶嫩色繞鐙

四明十二雷之茶日區茶不可多得

是則所謂西湖者也

湖湖

之始蓋自有唐王大令君照之所權輿其事闕矣近而可稽

斷自吳越作東府之右藩授懋親以旄鉞爰大浚夫重湖洲

島為之四出康憲之所經營尚約畧其有迹

錢康憲宅即方今廣盈倉基

四明談助

卷五

有宋之正隆慶中天于嘉祐賢牧彭錢於湖最厚

集賢錢公輔偃月隱

偃月長堤載沙立就如截如抱蓮香滿袖

紅蓮閣係章節公築其下即堤王益

柔所云湖光如截天如抱者也

衆樂新亭廊腰列綉虹橋憧憧夾岸左右

西

憧橋即今尚書橋東

洋洋湖心以祝聖壽有魚攸然亦叨神

佑

時則有若溫公荆公牽率名輩題詩恐後亦越三紀

更廓其初廣洲成十二劉所圖

劉戶部淑創十洲而成戶部于劉垕

烟花駘蕩

雪月清虛池塘春水芳草平蕪三眠之柳乍醉五粒之松長

腴葛陂竹實丹鳳所廬落英森森拒霜與俱雄風西合雌霓

橫舒時則有若陳王之徒唱和其區

陳忠肅與王巨舒直俱有唱和詩

嗣是

以還滄洲則高閣連雲

刺史趙伯圭作

涸虛則深館隱霧

王巨攄作

清風家臨平楚雉堞參天鎮山接武

即李刺史夷庚二分烟所治鎮明嶺也

水空濛三月風光媚
斌樓宣獻
湖上詩

四明談助

卷五

三

四明談助卷十六

錫山脉進城諸沙皆自南向北為府治作朝其第一重至四重不外月湖十洲茲先總登後再分列

西湖十洲

輶道圖經西湖在州南六十步中有汀洲島嶼凡十曰柳汀曰雪汀曰芳草洲曰芙蓉洲曰菊花洲曰月島曰松島曰花嶼曰竹嶼曰烟嶼四時之景不同而士女遊賞特盛于春夏飛蓋成陰畫船漾影無虛日也

全謝山西湖十洲志云鄞西湖之勝至宋元祐間而極盛南渡以後十洲皆遭變置約畧考定大抵中央得四而東西兩岸各分其三壽聖院為十洲首即花嶼也逸老堂即柳汀也

四明談助

卷六

芳草洲後改名碧沚松島即真隱館後名竹洲是中央之四址也由松島絕湖而東為竹嶼竹嶼之下為月島月島之下為菊洲史氏寶奎里在焉是東岸之三址也由松島絕湖而西為烟嶼烟嶼之下為雪汀雪汀之下為芙蓉洲是西岸之三址也 此特節錄大畧其詳分見於下

烟嶼

劉戶部瑄烟嶼詩 和者 王亘 舒亶 陳瓘

閒伴晚雲籠淺瀨半如秋雨暮寒沙溶溶曳曳拖輕素遮盡漁蓑與釣槎

離朱諦視也昏花一匹青縑蓋白沙咫尺漁舟看不見凡夫何處覓仙槎

著漠寒蘆不見花暗藏鷗鷺啄晴沙暖風吹起渾無定半落
僧窗半落槎

靄靄紛紛綠底事故來波上罩晴沙莫教散入滄溟去却恐
能迷上漢槎

謝山十洲志云由松島而西爲烟嶼劉理詩曰溶溶曳曳拖
輕素遊盡漁蓑與釣槎蓋湖上漁人皆居輿底錦里橋當其
南觀音寺橋當其北

自大坂田過烟嶼其水兩分一由錦里橋入月湖一由聖
功寺西出觀音寺橋入月湖烟嶼之上爲嬾堂爲邊進士
居爲錦里爲聖功寺在明爲陸氏諸第爲謝御史第爲萬
氏寓居爲全氏新徙第等蹟

四明談助

卷六

嬾堂

舒中丞亶有園在西湖歸里後與豐清敏周四休倡酬陳忠
肅晁景迂咸與焉所謂嬾堂者也延祐志宋時月湖丈尺圖稱
舒官人宅

甬上族望表西湖舒氏嬾堂學士自慈水遷鄞嬾堂不足重
以文詞爲一望而其後人烈爲端憲弟子又一望

寓公舒龍圖亶

字信道慈谿人治平二年試禮部第一調臨海尉民有使
酒罾逐後母者執之不服卽自起斬其首投劾去時王安
石爲相聞而異之累遷御史中丞崇寧初知南康軍辰溪
蠻叛蔡京使知荆南以開邊功進龍圖閣待制其在朝始

附安石後附蔡京然博學強記以詞翰見稱嘗知制誥直學士院制詞渾厚有兩漢風曹志從孫烈乾道八年進士裔孫纓嘉靖十四年進士官長史選舉表南郊雅兒渡橋舒氏至今尙盛其後裔也

附嬾堂和馬粹老四明雜詩十首

百粵喧譁外三江指顧中耕桑遺俗在草木故城空鄞郭也

近澤知田美俗重近澤田多魚驗海豐由來形勢地越絕控遼

東

澄水鋪千練平山伏萬犀月橋蓮棹小春圃酒旗低蓬島

雲長在邑有蓬萊鄉古史云金銀為宮闕望之如雲桃源客不迷風流未寂寞

遊屐半香泥

四明談助

卷六

御史平囚日平囚時在郡樓下郎中渡母年今謂渡母橋豐碑推筆妙

二碑皆名書孤冢枕城偏汝南孝子墓白鶴空遼次黃蒿尚蔓延九

原如可作執馭故忻然

箔蠶迎豆熟俗有蠶豆江雪伴梅消抵虎鰲經夏里語八月蟪蛄

跳沙蛤趁潮里語有跳沙蛤酒罌雙印貴俗重雙魚酒藥肆萬金饒謂馮

樓也未覺西風遠三溪好採樵慈溪小溪

巷陌隨橋曲閭閻占水窮郡樓孤嶺對古謂鎮明嶺市港兩潮

通聞在城東隅春暖雞鳴壘在慈谿秋寒鵬信風江湖所呼家家人富

足擊壤與吾同

歲熟不論黍俗以二束為一黍人歸夜擊鐘金澄沙底水龍臥井

邊峯金沙龍井皆在育王山香火長存社俗結金光明金剛社漁鹽每奪農年

來縑帛賤砧杵萬家春

稻飯雪翻白魚羹金鬪黃鮓埼千蚌熟在奉化花嶼一村香

在慈谿海近春蒸濕湖靈夜放光廣德湖每現光形北窻休寄傲大

隱卽吾鄉大隱山乃楊適先生所居

禽孝傳居俗禽孝鄉在奉化風颯動浹旬靈鰻旱日雨卽龍井也聖米

歉天尊凶年尊根為聖米江漲長如海冬温恰似春雞豚追伏臘

行路亦情親

佛磬雲中寺樵歌郭裏湖城居蔭楊柳野寇息萑蒲巫語

傳栢皎漁蓑入畫圖幽香滿花谷不趁雪霜枯

蓮閣紅堪掣池瀾靜不流池在府前梯航紛絕徼冠蓋錯中州

高麗比入貢多使者草市朝朝合四郭皆有市沙城歲歲修非人為郡城雜以沙故易

四明談助

卷六

頽雨前茶更好半屬賈船收

王直閣庭秀懷嬾堂詩

同舍弟泛舟西湖登晝錦堂步至紫翠亭望嬾堂景物懷

故龍圖舒先生

城中十頃湖雲水相演漾春風破冰谷拍岸流新漲平鋪鴨

頭綠澹淹蒲萄釀朱薨媚孤嶼梵宇麗相向萬瓦生新暉千

花聯錦帳晨曦照炯炯芳氣浮泱泱日暮姿態妍烟霞渺空

曠誰將水仙境聊借詩人仗臥護五羊城追懷老詩將微吟

示清野鑿戰得閒放變化無端倪虛無落名狀坐令湖上景

勝絕神宇旺當時經行地藻麗隨屢杖斯人今則亡物色亦

摧喪他年牛馬走曾拜丈人行塵埃久飄泊歲月成漫浪問

訊懶堂居松竹欣無恙尚意壁間聲時賡朱絲唱撫事重興
嗟陳迹徒悵望哦公十洲詩風月爲悽悵
句餘土音西湖舒中丞園

詩話豐清敏公與中丞同學于樓氏及入朝嘗薦中丞自
新法行而趨向異然歸里後與之倡和不廢四休周公亦
然可以見其大雅而洛蜀諸公自相矛盾以啓曠林之爭
可噓也已

懶堂風景真明瑟舊是豐周共學區一自黨人分部後重湖
詩社強相於
十洲詩與梅花艷湖曲誰傳宿老家三復王郎憑弔句我來
亦自重咨嗟

四明談助

卷七

五

西湖懶堂記

節

鮎埼亭集

鄞西湖十洲之尾舒中丞信道懶堂在焉中丞本貫慈水通
籍後居鄞今城南行春磬旁諸舒皆其裔孫而城中則明嘉
靖中長史纓是也懶堂在錦里橋之南居人呼之曰畧底以
其島嶼之盡境也實與樓楚公畫錦堂紫翠亭墨莊相望至
今居民尙呼舒官人巷中丞遊天童詩曰昨夜長鬚城南回
報道湖上秋風來醉園雨過月臺冷籬根白菊看看開忽見
江頭江月白紛紛笑語城東陌一尊北酒一枰棋未到懶堂
猶是客題十洲松島詩曰晚歲何人同寂寞水西我有讀書
堂皆指此也王庭秀遊西湖詩曰誰將水仙境界聊借詩人仗
微吟示清野麇戰得閒放坐令湖上景勝絕神宇王問訊懶

堂居松竹忻無恙其景物之爲人追慕如此志乘皆不錄非
闕歟中丞爲樓正議公高弟本屬正學特以附麗荆公遂爲
呂蔡一流力與坡翁爲難良可惜雖然中丞之文采則不可
掩故南雄與相酬答有舒周唱和集而陳忠肅公于十洲之
會凡吾鄉之勝地率以中丞詩著而湖上尤爲總持此予之
惓惓而不已也予家十洲之烟嶼于嬾堂最近雖竹石俱無
存者然每過之未嘗不愛其明瑟徘徊良久嬾堂之後人乾
道八年進士烈受業沈簽判公傳爲程氏之學云

邊進士家學

邊進士恢字汝實世著籍于鄞父承奉郎友誠無子子順昌
丞友聞之子是爲汝實也生而穎異承奉公教之嚴未嘗令

四明談助

卷六

六

出入閭巷延師家塾俛專其習黃州通判舒君烈其姊壻也
篤學多聞相與處累年開其端倪故自年十四五時已知學
問之大畧矣幾冠就學城南距家數里行必歷闔閭義方益
嚴日使以肩輿往來奇麗紛華不役耳目凡所以培植美質
充養德性而卒爲善士者家庭之教也幼習聲律長而愈工
論說古今能達意所欲言詞采俊麗自律愈謹不自矜衒不
與乖忤而人望其德容無敢侮之登紹熙元年進士甲科廷
對數千言詞意婉切指陳時政具有本末識者矚之授鎮江
軍節度推官始汝實嘗受教于金溪陸公有所啓發對策之
語蓋得于講切者擢第而歸不以所學爲足覃思經籍探其
精粹孜孜于司馬氏通鑑考理亂興亡之迹而推其是非得

失之原凡其充于身行于家者皆由是得之先是承奉公齊家有法闔門肅雍表儀鄉社汝實敬承其意家政益修承奉公年踰八十恩封疊至邦人以為寵汝實婉容愉色左右無違人無間言承奉公歿執喪甚哀將及大祥而汝實亦病矣家具祭索衰服加諸身如對几筵妻孥以其疾甚哭不出聲汝實曰焉有喪祭而不哀者命之哭蓋訖事之翼日而卒年三十八三子皆蚤亡以從子之深為後

集

邊之裕

友聞孫紹定二年進士

邊之基

友聞從孫

邊之問

恢子紹定五年同榜進士見選舉表

樓三學士宅

在舒官人宅之東瀕湖宋嘉定間月湖丈尺圖云樓三學士

宅取樓安撫宅後四十九丈六尺

樓三學士傳見竹嶼舊第下

四明談助

卷七

七

錦里橋

宋時月湖丈尺圖云錦里橋取竹洲西岸七丈三尺

趙學士錦里

在月湖西錦里橋北學士名彥逾以資政殿大學士知慶元

府建第于是故橋名錦里

嘉靖志

又名五馬街今俗呼莊衙漕

橋者即其故址

聞志

宋時月湖丈尺圖稱趙觀文府

湖語云何家錦里亦復嶙峋天水上公實惟宗親比輝墨莊

鄉郡所尊

趙閣學彥逾錦里正與墨莊樓氏隔岸相望亦以守鄉郡表閭

甬上族望表宗室錦里趙氏彥逾慶元黨禍之魁也而深寧稱之誤矣彥逾之子鉸夫則一望

趙資政彥逾

字德先紹興三十年進士累遷大府少卿四川總領歷遷工部尚書孝宗崩光宗疾不能持喪樞密趙汝愚議立嘉王為皇帝欲倚殿帥郭杲為用杲不應汝愚密告公公力贊其決行先是杲嘗被誣公為白於帝杲德焉公見杲語其事杲許之遂領兵為衛于是寧宗得踐祚及推定策恩汝愚拜相公以端明殿學士出帥蜀公始與汝愚協濟大計冀其引已共政及外除頗缺望乃疏當時名臣上之目為汝愚黨帝由是疑汝愚其兩入蜀皆有聲後守鄉郡以資政殿大學士終于家

宋史本傳

兄彥通弟彥遠俱淳熙二年進士

趙袁州簽夫

四明談助

卷六

八

初名筠夫改名簽夫紹熙四年進士為袁州守風節最著寶慶中真文忠公入朝上問有何廉吏以簽夫對詔擢直秘閣與監司湖語簽夫守袁魚釜塵甑登諸循吏西山所稱註云趙氏有袁州足雪其父黨禍之恥者也

史春坊宅

在湖心寺西橋下過北瀕湖左連徐運使宅見月湖丈尺圖錦里橋至聖功寺巷口一帶明時皆為陸氏之居

徐運使宅

在史春坊宅之北近聖功寺巷宋時月湖丈尺圖云徐運使宅前取湖心寺西岸二十一丈

楊侍郎宅

三於江安(理宗) 向有回廊東注 德義以表守廷 故夫對理宗御 尊擇故及巨 初因(按) 故言 四明名

在憧憧西橋下過北瀕湖右近聖功寺巷月湖丈尺圖云楊侍郎宅前取湖亭西岸二十一丈

西湖陸氏

陸氏為甬上四姓之一其家在月湖之西畔門施槩戟者相望鄰人各以其房別之曰尚書房曰副使房曰都御史房曰布政房曰榜眼房曰翰林房曰大廷尉房曰給諫房

人墓表

歸琦亭集陸舍

陸氏諸第論時之先後尚書第在前次中丞第次榜眼第次給諫第次廷尉第俱載于聞志今惟中丞第尚存 國初時已為提標中營署其餘遺址或易姓改造或漸成零星小戶無復舊觀

四明談助

卷六

甬上族望表西湖陸氏明初自山陰遷鄞宋時已有放翁之後遷鄞見前表而西湖之支後至而大刑部尚書諡康僖瑜廣東布政使銓山東布政使叅議欽右都御史世科行人司行人符殉難按察使宇燦中書舍人寶諸生宇燦殉父孝子崐共九望

陸尚書第

縣治西南月湖之西刑部尚書陸康僖瑜所居

聞志

刑部尚書陸康僖公瑜

字廷玉號省菴宣德八年進士授刑曹歷遷郎中以才望出為山東布政使齊魯大饑貧民相率鬩取富人粟監司坐劫罪公曰民饑取粟延殘喘以免道殣耳忍復殺之乎

竟從輕擬英廟初復辟李文達公賢嘗薦公于朝及刑部尚書缺遂徵拜公及陛謝上語左右曰刑部職司民命乃今得人矣曹欽之爲亂也變起倉卒公昏夜被執旣辨其爲公也曰是素平恕遂釋不害或執欽佃人數百輩爲逆黨公曰欽謀倉卒諸佃相去或數百里豈得與謀盡釋之公前後在刑曹十八年尚書十五年倚任旣久遂爲國家名法臣第一公家在鑑湖晚年鶴髮曳杖逍遙十洲間爲詩弔賀季真里居復十七年卒年八十一謚康僖耆舊子 竣以父蔭官四川榮昌知縣聞志 李景瓚占命聞京師至山東謂陸布政瑜曰刑部劉尙書休矣公宜促裝代之已而果然水泉日記

四明談助

卷六

十

陸康僖公畫像記

鮎埼亭集

前漢人物武皇以前爲一輩武皇以後而一變武皇以前將相之中周昌王陵張蒼張相如申屠加周亞夫竇嬰汲黯之徒或如璞玉渾金或如蒼松古柏望之木訥不知竭天下之智名勇功不足過之此所以養一代之元化也武皇以後朝廷大夫之氣象日以發洩而漢治亦自此而衰前明人物亦然孝宗以前爲一輩孝宗以後而一變孝宗以前巨公多厚重端默不見圭角孝宗以後則發洩殆盡矣人物之厚薄世道所由汙隆也同里陸康僖公乃孝宗以前名臣之一其爲山東藩使二十年超擢尚書未嘗有赫赫之名而稱于其職當世推爲舊德無有異詞則所謂

厚重端默不見圭角者也予家世與陸氏爲鄰時得瞻拜公之遺像故國喬木不僅桑梓之敬恭而已以貌取人亦有出于物色之外者未必皆當然德充之符其可信者十之九卽以康僖之像言之其淵然者則璞玉渾金也其靡然者則蒼松古柏也斯豈晚季人物之所可望哉

陸副使健

字文順康僖公之族孫爲諸生時金御史洪言于學使者請徙寶雲寺于戒香址而以寶雲寺址爲明倫堂公爲之規畫其事登宏治壬戌進士官刑曹陞貴州僉事會乖西苗亂久不能討公乃佯爲罷兵之議募黥者薙其髮作行脚僧乞施悉其傍徑胸懸小囊盛中土草實撒岐路東西

四明談助

卷六

十一

分處先下令軍中取拳石附膝間及春草種生下令去膝間石視草所生處前行直抵苗窟賊皇遽走踞山巔滾木石如崩雷公先期爲板屋以庇其屋材人各肩一入抵其處卽構之賊驚爲神又先遣壯士數人援山樹幟發砲賊駭擾氣奪無鬥志斬殺無算殲其魁苗境悉平時刷卷御史沒其戰功已而轉福建副使憤恚遽卒囊無留貲會鄉人姚鎮官于閩與同僚爲之歸其喪弟佶與公同舉宏治戊午鄉榜爲雩都縣令聞志同宗屋正統丁卯舉人坡成化辛卯舉人知府倬宏治辛酉舉人

陸中丞第

月湖之西都御史陸鈞與弟布政銓同居

聞志

今爲大廳署

陸榜眼第

在中丞第南鈞之季弟正德辛巳科進士及第欽所居開志

陸宣義儼

字文亨其父琬病革叔子偁尚幼呼公謂之曰使弱子不廢學者汝也于是公獨肩家政銖金寸帛不入私室而延師課弟偁惟謹既成進士又使諸從子皆成進士兄弟子姪愛敬終身家有二貓乳子互相易乳閣老李公東陽爲作樂府詩記其事好施予貧者稱貸如所欲與之券亦不却旋即亡之宏治間以輸助授宣義郎開志

李西涯樂府詩

貓相乳遽如許但知母子恩不復我與汝貓相乳世希有

四明談助

卷六

但食乳哺甘不知誰是母陸家兄弟本同胞提孩挈稚相爲勞和氣感物成薰陶吁嗟乎人生胡不如此貓

副使陸公偁

字君美號瑁洲康僖公之從孫贈御史琬之叔子登宏治癸丑進士授監察御史巡按福建山東所至有聲陞福建按察副使巡視海道時海寇充斥公乃濱水戰火攻之法距擊之而又嚴哨探定保甲邊徼肅然及被論免歸監司行部每見咨訪如障陂東湖增石它山堰皆惠一鄉者嘉靖志

志

碧洲翁孝友天至親亡躬負土築墳兄病親爲嘗藥其培本于大有如此者年八十有四配楊淑人冢宰守耻之女

年八十子三皆顯其堂聯云椿萱雙福壽橋梓四科名聞志

孫法嘉靖庚子舉人鄞獻衣

副使陸偁夫人楊碧川女也生三子俱進士登臚仕側室生一子以其居三昆之間無憂無辱稱為仙人一日過家慶三子俱冠服奉觴偁戲語夫人曰汝須謝我生此三子與若夫人曰汝須謝我胡反言也偁曰何也夫人曰此由吾楊氏骨氣三尚書同一脉否則仙人胡不貴乎偁大笑仙人一支迄今陸氏稱為僊人房敬止錄

副都御史陸公鈞

字容之號石樓按察副使偁之長子也與弟銓鈇並有名中正德甲戌進士授南車駕主事稍遷郎中出知安慶府

四明談助

卷六

十三

自逆濠變後公至務以安靜拊循之郡中大治歷陞副都御史巡撫保定時世宗南巡公經畫百務立辦中貴索賂不與落籍歸著有石樓集耆舊傳

吳笨子士璋

題陸侍御涵虛閣詩

空明無處不宜人柱史樓臺喜更新能事謾酬千載願閒情且傍十洲親山來座右時為主月到湖頭亦作賓莫惜倚闌同嘯傲題詩王翰在南隣

布政陸石溪先生銓

字選之按察副使偁之第二子也美風儀質性英銳過人以嘉靖癸未進士為刑部主事值大禮議起先生與弟編修鈇伏闕力諍俱廷杖下詔獄尋以才推典十三司章疏

數斷大獄歷轉禮部儀制郎中竟以永嘉所忌出爲福建按察副使尋遷廣西按察使時弩灘獠爲寇議討渠首而釋其餘弩灘果定陞廣東布政使以內艱歸卒于家著有

石溪集耆舊傳

石溪先生獄中次季舉之詩

官非司諫終難嘿事係倫常敢顧身聖怒不妨爲孝子狂言豈敢託忠臣古槐蔭滿常靈日鵬鳥晴飛不畏人咫尺忽傳雷雨至餘威還懾怒龍鱗

副使陸公鈇

字舉之號少石按察副使傅之第三子甫能言母楊太淑人命以字百試不爽稍長神智銳發中正德庚辰會試明

四明談助

卷六

十四

年廷對擢一甲第二拜翰林編修益盡覽中秘書馳騁古今館中宿老俱下之以爭大禮廷杖會大禮告成議禮者已當軸遂出公爲湖廣按察僉事歷遷山東提學副使敦尚風俗士習爲變山東舊無通志公慨然曰聖賢百世之師也泰山五岳之宗也六經斯文之祖也此一方之文獻而天下古今之事備焉志奚可廢也遂彙古採今窮日夜不懈踰年書成而公病矣卒於官著少石子集三十卷耆舊傳

少石獄中與兄同牀詩

棘墻鎖館暗青梧跼踏連床氣未蘓海內冠裳今並辱天涯手足自相扶枕邊風雨愁交切夢裏池塘興不孤天外

數聲鴻雁侶祗緣羅畢散江湖

陸通判繼魁

字體文提學翰林武之孫也官陝西鞏昌府通判

續者舊傳

陸佛民先生觀

字賓王號佛民廣東布政使銓之四世孫少于書無不窺工詩古文詞而不自表見丙戌後悵然棄其諸生其時族父周明先生執掌戈甲間而先生與居相近深坐複閣中雖祖父忌日俱不出臨獨周明至則納之語乃知二人之跡不相肖而心相孚也先生前此授徒甚多至是皆莫得至床下惟林都御史繭菴偶一見之已亥病卒諸弟子來會弔者始見其髮鬢鬢然未有損也皆為流涕又四年周

四明談助

卷六

七

明竟以事死蓋自國步改易抗開雍之命者或終身逃之島上獨吾鄉蛟川薛公白榆與先生偃然居城市中風波不及鬚髻依然斯亦高蹈之一奇也有佛莊小草

鮑琦亭集墓志

陸給諫第

在月湖西陸給諫懋龍宅宅後有老桂枝蟠高結環圍如井舊有雙井今存其一

聞志

宅後又有檉松一株立巖石間泛湖人望之亭亭可愛今宅屢易主不特雙桂無存松亦摧為薪矣至嘉慶戊寅四月間并屋亦毀於火

陸贈公瀚

字順德號十洲質直好義嘗任金谿丞以抗直罷歸家居賙乏垂老不厭兄海弟沐家貧贈公自鬻沙木材具以濟

舉七子攀龍登嘉靖戊午鄉薦懋龍成進士由都諫爲大
叅贈父如其官其餘俱名諸生聞

陸叅政懋龍

字啓原號珍所萬歷丁丑進士歷刑科都給事中秉直不
畏強禦補外歷官湖廣叅政不易所守嘗倣范文正公贍
族法捐田百畝分給兄弟仁澤徧及里黨聞

陸舍人寶

字敬身一字青霞學者稱爲中條先生其尊人大參官給
諫鄞人以其房別之稱曰給諫房亦稱桂井陸氏先生少
喜爲詩屠儀部長卿隆與沈尙寶雲將泰爲社集引爲小
友以太學高等授舍人典誥勅已而以母老乞養不復出

四明談助

卷六

六

時楊尙寶次莊

德

亦家居乃糾合里中詩人李封若

桐周

農半

元

共爲甬東詩括一書三百年之風雅始有所萃有

別業一在仲夏一在大禹王廟前北里南館絕不以家事
關懷會國難作傾家輸餉事去遁入仲夏而城居爲北來
大將軍所据馬湏羊酪雜還其間先生匿影不出者五年
幸大將軍去得歸年逾八十詩逾萬首割羊祭三百篇以
來之詩人盡集同社人享餞曰吾不愧放翁之後矣次年
卒先生藏書最富多善本吾鄉之以藏書名者天一閣范
氏次之四香居陳氏又其次則先生南軒之書也家既喪
敗書亦散失無存所著詩初集曰霜鏡次集曰辟塵三集
曰悟香其餘別爲小集尚數十種先生南軒之書盡失近

猶得其宋槧寶慶四明志書斯絕無之本也

鮪埼亭集墓表

陸行人符

字文虎曾祖州丞瀚祖相龍父煊俱庠生先生風貌甚偉胸貯千卷罄欬爲洪鐘響一時士大夫聽其談論皆以爲陳同甫辛幼安復出吳楚名士方招羣植黨互相題拂先生謂兵心見于文事鬪氣長于同人亂亡之兆也崇禎辛巳復保舉之制副使許平遠豸以先生應詔詣京入國學上幸學先生充班首進退從容上屢目之舉壬午順天鄉試監國時賜進士出身授行人司行人清查衛所錢糧千戶馮如斗乾沒獨多恐發覺刺先生于廳事不殊歸而養病結雪瓢于白巖山丙戌十月卒年五十先生胸懷洞達

四明談助

卷六

七

熱心世患乙亥上以祖陵震驚下詔罪已開釋罪廢召山陰毘陵相吳縣諸君子皆有翹然自喜之心先生以爲此消長之會也彼方以泚泚快心此復以夬夬意得正如瘞瘡一寒一熱出反彌甚元氣隨之果未幾而烏程排吳縣礫壑陽矣先生之料事如此

南雷文定墓志

弟箴字文饒諸生有

遺詩采入續耆舊集

陸大行環堵集序

鮪埼亭集

陸大行遺集散佚于兵火之餘者其嗣子攜入京未幾亦卒族父右仲先生故大行外孫也時亦客京亟攜之歸以與其孫又數十年而其家索予爲序予向嘗聞之南雷先生以爲先生蓋陳同甫辛幼安之流及讀先生遺集雖奇

零非完集然想其磊落英奇如遇之眉宇也先生之死以馮千戶之刺也當是時小朝廷如蝸戰武人大君莫可嬰也故朱閣部且死于方國安之手顧尙書死于賀君堯卽董戶部守諭亦幾死于王之仁以先生之芒角豈得免乎吾又嘆有明之儒者大率迂闊而乏才使得如先生者早據時位而有爲未必無補于天下乃以三舍齋長困于賢書垂老得售而滄海揚塵書生報國不能以赤手搏虎狼身名與之俱斃豈不悲夫先生嘗與先宗伯公子非堂先生讀書竹洲其後訂爲婚姻而集之得存亦以吾家則序之者莫予若也

張大令幼學桂井詩

四明談助

卷六

六

瑤臺青桂太玲瓏可愛機雲組織工木本不妨能繞指花神底事會蟠空衆香成國風難度獨坐觀天月正中應是素娥嫌舊魄人間別構廣寒宮

陸翰林泰

其後人稱翰林房

字 贈都諫瀚之從弟嘉靖癸丑進士改庶吉士初任翰林院編修歷遷福建按察使提學副使鄞獻表弟學字夏父隆慶庚午舉人歷官河南彰德府同知著有自適草聞志從兄冲嘉靖己酉舉人冲子樛隆慶庚午舉人同宗起元萬歷戊午舉人武城知縣大任天啓甲子舉人

陸孝廉山輝

字紫盦提學泰孫也崇禎癸酉舉人所著有紫盦集丙戌

後不出吾鄉孝廉得以前鄉貢進士稱者蓋寥寥焉惜其
集不可得

續音
舊傳

同宗德漸字鴻志以明經官乳源教諭有

風山集

陸廷尉第

月湖之西康僖公宅右大理寺正卿陸世科所居

聞志

贈太僕陸公大漳

字德學天性和厚而節介極嚴少嘗館于吳之烏鎮夜聞
叩門聲啓視則一少婦閉門拒之次日託他故辭去又有
范奎者得館貲十餘金歲暮與公返同舟遺其包而去公
亟趣僕追范舉而還焉范分半相酬力辭不受萬歷丙午
秋公夢爲神所召謂之曰爾于人間做好事自今大道上

四明談助

卷六

九

行矣是秋子世科登鄉薦戊申年八十貢于鄉子又成進
士越明年卒後累贈太僕寺少卿

聞志

大理寺正卿陸公世科

字從先號貞吾年踰艾始登萬歷丁未進士第授建安令
父大漳猶在迎養于署每事必咨焉凡八閱月而父卒服
闋補增城令擢御史天啓初魏忠賢生祠徧天下公不與
通遂削籍崇禎改元召還遷南大理卿致仕當逆奄勢盛
時人多附勢惟公與同里李宗伯康先屹然不移誠使四
明生色卒年八十三贈右都御史

聞志

陸都事字燿

字初明右都御史世科第二子孝友忠恪屢困諸生生平

不務矜炫而心惟好善處宗族鄉里無不藹然以父蔭授都督都事遇變未仕子經正登國朝康熙癸丑進士證

累德之報聞志

節介陸先生字燦

字周明別署贛菴右都御史世科叔子也右都五子先生與其弟宇燦並有名當南都覆沒時先生慟哭學中適董幼安至相抱而號因聚謀爲起兵計會張公雲生華公吉甫王公貞一毛公象來不戒而集董公出載書于袖中先生遂連名署紙尾顧徧謁諸縉紳莫有以爲是者計無所出先生沉吟良久曰是唯錢刑部虞孫可語但彼以喀血踰年不應客吾當排闥見之乃往直入臥內告焉錢亟強

起曰不敢辭先生曰決乎公曰決矣不告其家遂行召募數日事終不就會聞紹興兵起諸縉紳始稍稍集虛左席以讓錢公而夫已氏者方從江上迎降歸欲敗其事貽書定海鎮將有殺六狂生以靖亂之語當時六狂生皆婁儒獨先生以貴公子毀家輸餉夫已氏尤欲殺之不料其計之不行也先生貽之書曰昔德祐之季謝昌元贊趙孟傳誘殺袁進士以賣國執事之家風也今幸總戎不爲孟傳遂使執事不得收昌元効順之功以是知賣國之智亦不能保其萬全也夫已氏得書咋舌而已監國次于會稽授先生監紀同知俄進按察副使仍監軍時馬士英亦逃越匿方國安軍中先生陳士英十大罪乞梟其首以謝江左

同朝王詹事思任莊給事元辰皆助先生言不報黃侍御宗羲亦廷諍之卒格于國安而止先生歎曰卽此已不堪立國矣遽棄官歸遯入榆林而士英果挾國安以爭金華江上軍事爲之崩裂諸軍航海先生爲馮王二侍御募兵于榆林已而皆破于是六狂生者相繼死其四而先生之志不灰翁洲之破也先生捐金與謀者令訪死事消息乃得聞張閣部之孫以俘至亟治橐餽入獄視之語其弟宇燥使爲脫繫董公幼安之喪在海上先生致而葬之又與江都督子雲謀葬王侍郎之首已亥之役蒼水以孤軍入江北先生爲之飛書發使其家初亦不知但見其喜形于色私相語曰殆有好音聞其敗也當食失箸是時蒼水在

海上遙仗先生爲內主壬寅降卒以先生之事告捕至錢塘先生已病用奇計出獄門抵館而卒先生所唱酬者周順德囊雲王博士水功矢詩不多沉痛悲楚合爲一卷曰霜聲集先生旣以此落其家遺言諸子雖貧無得妄求宦

達聞者哀之

鮑琦亭集墓表兼續耆舊傳

句餘土音陸觀察竄首并補傳已錄于城西中秋競渡下

陸披雲先生字燦

字春明別署披雲右都御史世科之第五郎也贛庵副使之介弟負才自喜俯視一切副使風格稜稜不可犯而先生稍濟之以和故時人視之有冬日夏日之分然其刻意

厲行則一也丙戌後棄諸生與喪職之徒遊荒亭木末時
聞野哭管江杜秀才懋俊仗義物故先生藏其義孤憲琦
延師教之長爲授室華亭張閣部孫茂滋囚鄞獄中先生
百計出之茂滋旣出而病幾死先生一茶一藥無不躬親
葉布衣謙蚤天先生養其母終身其後茂滋旋里甫舉一
女而卒憲琦亦天先生每與客言之未嘗不於邑廢餐桐
城方授亦遺民之好奇者避地來鄞先生館之湖樓中授
遊象山而卒先生經紀其喪收拾其遺文以致其家青神
余齋來鄞亦館于先生由是盡喪其先人之產而不顧也
副使崎嶇島寨之間已而終以降卒所牽逮入牢戶禍在
不測先生上奉家廟下撫諸姪神色自如風波甫定而兄

死矣先生隻輪孤翼身益窮節益厲故太史葛公世振被徵
親從爭從臾出山先生以十絕爲祖道祝之以危學士和
州之役太史歎曰吾尚可以行乎力辭不赴先生自棄諸
生卽練衣蔬食叢林或以爲佞佛勸之披緇笑而不答及
遺命不作佛事衆始霍然然以先生之大節言則此特其
緒餘耳所著觀日堂集八卷藏于家

鮚埼亭集墓表
兼續耆舊傳

觀日堂詩集序

鮚埼亭集

春明先生觀日堂集前太常林公序之董曉山先生又序
之而先生之子經且屬予重爲論定嗚呼宋謝臯羽作獨
行之士日表又選天地間集蓋傳其人思卽傳其言也先
生之人獨行表中人也先生之詩天地間集中詩也而其

遺文亦無過而問者可不爲之痛歎華亭之二陸其才非流輩所幾赧焉入洛至使人大呼其祖父之名以問之而不自愧不知問者之深心也先生偕其兄力持苦節以不愧世臣之後今讀其詩淚痕隱隱行墨間是豈華亭之所能及哉然而自先生喪失其家貧窶日甚經旦亦老病歎諸孫之不學故以遺集屬予望爲傳之其亦可謂不忘其父者矣先生之於予家交誼最篤先族祖葦翁嘗貸金于先生因請以百尺西樓七間歸之未及致而葦翁以國難死先生以其同袍澤也以券來歸蓋其義襟若此乃予爲先生作阡表已備書其大節顧于吾家之事闕焉因序先生之集而見之

續耆舊傳後記云右都子予家爲南隣相隔祇一墻先宗伯湖上之集右都以後輩叅焉先大父兄弟與先生兄弟以此相親如同產先侍御緩急最多及殉難後先生絕口不及先大父尤感之

陸蘭州經正

字復古大廷尉世科之孫都事宇燿之子登康熙癸丑進士授山東利津縣知縣同選者多貸金以壯行色公獨與兩蒼頭策蹇之任邑征額有陋規吏告以舊例可取厲色叱之無稍溢錙銖者民感之輸納如約不施鞭撻而正供獨先諸邑訟者初投牒卽詰其情僞隨聽斷無久淹者任滿晉蘭州知州旋乞致仕歸

此乃抄本

不波航記 鮎埼亭集

陸周明先生兄弟有屋數楹附近賀秘監祠下真隱觀湖心寺俱當其前衆樂亭峙其左碧沚菴斜映其後樓之旁有橋橋之旁有柵湖水入焉登樓一眺湖之勝可盡也其名曰不波航爲宋澄清亭址先生尊人大廷尉公始築涵虛閣而元生兄弟廣之周明自江上歸姚江王侍郎懸首城西門周明篡取以歸藏之密室每逢寒食重九輒招邀同志祭之航中放聲慟哭哭畢各有詩記之雖家人莫知其誰祭也張尚書之死周明已卒春明之設祭亦必于是舫焉其素往來是航者持禁甚嚴稍涉山王之嫌者輒被拒祇高武選隱學王太常水功宗徵君正菴董隱君曉山

四明談助

卷六

高

葉隱君天益范公子香谷及先生族子雪樵吾家諸祖木翁葦翁而桐城方爾止華亭宋菊齋成都余生牛爲寓公其時唱和最多周順德囊雲矢不入城然每遙和其作三寓公既散李徵君昭武朱隱君柳堂與先贈公亦屢集其中嗚呼是航雖小謝臯羽之西臺也邏舟之所不過中流之所不移甲乙丙之所不諱滄桑搶攘之際是航之所維者大矣自耆老相繼凋喪昔年詩筒所集化爲酒爐團夫皂隸喧呶其下湖光亦爲之黯然豈知當日固朱鳥之所集乎周明先生子經異乞予爲記遂巡未作而經異亦化爲異物矣適輯湖上叢書爲踐此諾百年而後更不須張孟兼輩之攷索也

陸明經鑒

號雙水康熙甲申歲明經陸氏詩派自石溪方伯始敬身
舍人繼之文虎又繼之春明又繼之後少衰而雙水振之
有閩中紀行詩雙水詩鈔其在南湖秋水社中與族兄鑒
並有名稱二陸續耆舊傳鑒有小放翁稿三補耆舊傳

陸孝子廬歲寒館

節孝陸雪樵先生之居與大廷尉第僅隔一巷

淳古翁陸介祉

字純嘏節孝處士岷之父也諸生丙戌後棄之喜畫老松
古柏以見寄寓董次公天鑑二戶部極重之其遊淮上林
茂之孫豹人亦重之華亭沈東生再至海上朝夕必過先

四明談助

卷六

五

生董曉山曰淳古畫得文人之三昧不在畫家之列為人
落落穆穆嗜飲人有招之無不至至稍醉即隱几臥或竟
去不問主人任天而遊世以是益高之節孝死先生忽忽
不自得竟以窮卒次子峻亦能傳其學續耆舊傳

節孝陸先生崑

字華星又字雪樵諸生介祉子也少有至性三歲其祖授
以孝經跪而承之每在長者之側肅如也七歲能詩又四
年國亡其父棄諸生隱于畫先生忽請於父曰吾家明室
世臣兒願得以白衣養父可乎其父喜曰兒能如此吾復
何恨由是先生棄舉業族祖春明先生為七子之集先生
故學詩于春明遂引之入社時七子者葉天益年最少而

先生年未及冠同登汝社一時詫爲異事先生故嘗受業于王公石雁戊子五君子之難爲之經營其家甚力人以爲難先生以館穀養父每遇其母忌辰雖甚風雨必自館中求母所嗜歸陳之未至家已嗚咽旣至長慟其父亦不忍聞也已亥夏海師自穿山入東村大掠先生父子方居東臯之殷氏亂兵先執其父索餉不得欲刃之先生跪請願以身代遂死而其父得生聞者傷之同志私諡之曰節孝處士得年二十七歲有雪樵集續耆舊傳

陸隱君峻

字金文諸生介祉子也其畫得父之道詩亦不俗以貧死

續耆舊傳

四明談助

卷六

五

記汝社鮎埼亭集

雪樵先生係周明觀察之族孫丙戌以後不復出試乃放浪爲詩人時觀察之弟春明方舉汝社于湖上故錦衣青神余公生生自燕來黃山宗正菴蛟川范香谷同里董曉山葉天益皆集焉而雪樵最少觀日堂者春明之居也雪樵與五人者靡日不至以大節古誼相交勗語者默者流觀典籍者狂飲作白眼者痛哭呼天不置者皆見之于詩雪樵之去春明僅一巷而與正菴爲比戶其唱酬爲尤多桐城方子留畸士也由春明以交雪樵相得甚懽遂於其湖樓中寓居焉

方子留湖樓

鮎埼亭集記

桐城方先生子留者名授一字季子吾鄞西湖寓公也子留以乙酉之變棄諸生薙髮狂走方外其來鄞也以丁亥旅蕭寺求甬上志節之士而未得或引而見之華公嘿農王公石雁陸公周明春明兄弟則大喜因徧交范公香谷宗公正菴之徒相與慷慨謀天下事是年冬五君子難作嘿農石雁爲之魁香谷亦幾死子留本參其事幸得漏網傾囊盡周諸公之急與周明輩爲詩因寓其族孫雪樵之湖樓居久之或謂之曰足下有老母乃遠客耶子留瞿然遽歸壬辰復遊鄞仍寓陸氏之樓癸巳子留自天門山往石浦蓋有探于海上之消息疾動竟不起湖上之詩人以子留罷詩會者期年且相與哭之子留詩文集共一卷董丈曉山序之附其櫬以歸予

四明談助

卷六

毛

年十三侍先公過陸氏指湖樓曰此方先生哦詩處也嗚呼當明盛時湖上之亭榭多遊人栖息而獨是樓與余錦衣借鑑皆出於亡國之後說者以爲故國之星火繫焉是則雪汀竹嶼所與終古長留者也

由雪汀竹嶼句觀之則雪汀借鑑二樓亦在湖上矣但雪汀亦在湖上

余生借鑑樓

鮑琦亭集記

鄞之西湖以賀秘監嘗遊息於此故有小鑑湖之目借鑑樓者故錦衣青神余君生生之寓寮生生名齋一字眉山爲太保尚書肅敏公子俊之後以尚書恩世襲錦衣其自蜀而徙燕非一世矣生生以明經起思由甲科進取故錦衣之官未任已而國亡始來鄞儻居湖上有七子詩社而生生最長社中奉爲祭酒爰署其居曰借鑑樓諸公在湖上者陸披雲有

此處以有之陸氏與雪汀亦在湖上

觀日堂示正菴有南軒陸雪樵有歲寒館生生之樓皆與相望
詩箋往復昕夕旁午蓋居樓中者二十年一日偶題其集曰
四明余壽先大父贈公見而笑曰是所謂久假而不歸者歟
生生始而長吁繼而涕泗闌干晚年尤困以其女適姚江挈
其孺人往依之然猶戒諸公封固是樓無傷薪木一歲之中
以三四至則啓是樓而居之嘗曰吾雖死猶當作湖上寓公
聞其言者莫不悲之吾鄞城郭之秀湖上爲最湖之秀七橋
以西爲最是樓也適當烟雲平遠之區空濛綿渺宜乎生生
之歷二十年而不舍也有借鑑樓集已失

句餘土音擬薤露詞

不思蜀

余使君結社

四明談助

卷六

庚

出三峨投五輿我今不思蜀此間足寄傲五輿多遺民西臺
甲乙倫相與向三峨以招望帝魂望帝遠不至西臺空涕淚
竹如意紛破碎

詩話余公生生爲肅敏公後裔雖蜀人而居燕以世隸錦
衣籍也甲申後來鄞與宗正菴陸春明范香谷董曉山葉
天益陸雪樵爲湖上七子不減謝翱之汝社

宗徵君宅

詩人宗正菴誼自徽遷鄞居甬東後徙湖上與陸雪樵爲比
戶所居有南軒

宗徵君正菴先生誼

字在八號正菴其祖自徽遷鄞以懋遷有無爲業先生之

父以此豪于貲而先生之性所好獨在詩若婁儒然江東起事議以正兵食正餉義兵食義餉正兵者方王諸營是也義兵者孫熊錢沈諸營是也正餉之出自田賦者既盡隸方王而義兵但食其地勸輸之餉勢既不給尚時時爲正兵所掠奪于是遂乏食先生慨然發其家得十萬金徑送錢督師營督師疏請獎之且言其宜在館閣先生曰是將以卜式出身也辭不赴江師航海資糧屝屨不能不仍仰之內地先生家已落猶賃其田園奴婢之未盡者以應之蓋至屏當一空遂無擔石之儲而先生怡然湖上之結社也陸披雲董曉山葉天益陸雪樵皆鄞產范香谷則定產而蜀人余生生以寓公亦預焉先生口吃恂恂和易然

性狷急人不知也嘗于座中擁爐圍火適有客至其人頗遊時貴之門將以淡巴菰引火先生拂然遽曰汗吾火矣晚年所居僅破屋時至絕粒然仍哦詩不衰絕口不道前事所著詩刪定得六卷曰愚囊稿藏于董小鈍家蓋周卽墨所手書也

鮑崎亭集外編

句餘土音擬薤露詞

汗吾火

宗徵君習客

三百年來士大夫更誰曾啖淡巴菰一星之火不可污

詩話正菴先生性介特或以淡巴菰就其爐中取火嘯然詈曰汝非學士大夫耶

附正菴里居詩四首

思飲酒作

今人縱飲殊失算古聖惡酒亦得半裁度古今得失間孔子曾教飲不亂老夫幽居百事難鄰家餉午吾朝食有懷但欲爲微醉無從覓之眉幾攢却取空觴傾入口亦覺酣然如飲酒

寄湖上潘子霖

新月飄飄湖上去漸到潘生讀書處光寒湖水秋欲香潘生此時坐草堂家貧愛酒不能得但令兩子誦文章讀罷孤行兩堤上蒼天見此應惆悵蒼天蒼天奈爾何有懷但付明月多

鑑湖久不屬目有懷往事書寄曉山

四明談助

卷六

三

我生三十始得友命我湖中覓詩酒每來花嶼流霞初亦立虹橋烟捲後雙柏聲招謁秘書纍纍三島分野漁古稱十洲已莫攷雲地霜汀猶有餘遙憶當年建城郭山高水長何寥廓黃冠野服賀公歸獨領流風傲邱壑往歲清秋月十六董生過我湖千宿桂香入夢起披衣月浸湖深酒已熱一吟一和鷗鳧驚老僧禪寂燈微明葉子念母早歸去水氣漸摩湖有聲看雲看湖須看雨柳下孤舟阿誰主扞花亭畔弔古人秘書以後誰堪數人言史相有諸孫茅屋一區碧沚存讀書看湖足真意之子庶幾可品論吁嗟落落眼前事我走西湖消客思西湖雖好酒不如歸訪甬東舊酒肆

別南樓吟

年時慕作花鳥主容膝南軒浪揮塵名福無多鳩欲來何
巢可退吟風雨先慈供佛開南樓石磬吾曾擊素秋儒書
且並梵典列客茶僧果猶能留寢興容易逾坎壈父子嗟
吁若相和百年生計果何如十日烟興即可賀南軒不守
幾酸辛此時彌覺懷逡巡最是樓頭今夜月照來不是苦
吟人

後附門下二士傳

范布衣梧字素園一字寄翁諸生溶長子也與其弟核為詩
學于宗正菴之門宗氏詩多山林草澤之音寄翁亦其中
一高弟也惜以無後詩多散佚續舊傳

四明談助

卷六

七

范文學核字次肴一字緘翁諸生溶次子也少與其兄寄翁
並學詩于宗丈正菴家世寒素年幾六十始補諸生畢生
但知為詩布衣破帽搓手而吟情狀癡絕垂老尚有童心
語及冶遊則欣然神往擅勝尤在五言得古人小樂府之

遺續舊傳

觀日堂詩社七子

青神余生生 黃山宗正菴 傳俱見前

蛟川范香谷

寓公范公子兆芝字香谷定海人工部員外郎我躬子也
工部嘗以不賂權奄得罪被放先生少負奇氣壻于同里
謝氏故豪家先生夷然卑視之獨于其中取最少者二人

曰是稍可耳其餘皆奴才也時人比之趙岐丙戌爲亂兵縛去逃入空山七日不食且死故人周義士揀之明年十月與于甬上五君子之禍已赴市矣其婦叔謝時符謀之諸俠行賂于吏以死囚代之得免庚寅又爲山寨所連蓋五年中八徙而家凡三破乃定居于鄞鄞士陸披雲輩以先生至大喜于是有七子之集先生自游江上諸幕府以來連遭挫折不自得每酒闌日暮語及平生則怒髮裂冠彈指出血座上人咸惴惴惟恐其詞之未畢也貧日甚好義亦益甚華亭張閣部之孫茂滋被俘陸公子披雲出之獄未能爲其歸計也先生曰在我而已爲之治行李設祭于閣部墓前送之歸華亭復與閣部故將汝應元謀其家

事方去既歸益婁投徒罌湖之上後以謀葬父遊粵中甫至而病遂不起其從人爲旁皇作歸櫬計適有自慈谿至者過之泫然泣曰是嘗拯我于厄者殯當于我歸卽爲輿致其喪至家然其家終莫知所拯于是人何事也先生所著有廿一史評杜詩釋莊子注皆未卒業其復旦堂集亦無完稿先生沒後其婦弟所謂最少二人者一以進士爲御史一以明經官大令皆周卹其家爲葬兩世以報之先生風格最峻姜編修湛園嘗客其家一日泛論人物湛園以科第裁之先生作色曰以科第重人足下眞俗子也拂衣竟去湛園謝過嘗與人終身誦之續耆舊傳

句餘土音擬薤露詞

笑謂此家兒

范公子疎親

馬融紈袴習邠卿非所諧笑謂此家兒強半皆奴才關西節何崢嶸誰其嗣之香谷生

詩話香谷先生壻于謝觀察家諸舅豪華焜燿香谷視之無有也時人比之趙岐及桑海大節蔚有光矣

同里董曉山 見西城董氏本傳

葉天益 見北郭葉氏本傳

陸披雲 陸雪樵 傳俱見前

宋菊齋寓湖樓

鮎埼亭集記

菊齋高士宋龍字子猶太倉州崇明人張儀部采高弟也沈博有深識補諸生不求聞於世世亦無知者獨錢忠介公一

四明談助

卷六

七

見奇之置之門下上座謂當與崑山歸莊伯仲未幾大亂菊齋遂邁奇疾狂走其所嬉遊怪怪奇奇人莫測也而菊齋泛海至浙中張閣部客之使爲其孫茂滋授經則菊齋之病愈矣菊齋在舟山數年時與蘓儀部兆人輩唱和海上諸公皆重菊齋而辛卯之禍作凡平日所往還者皆死菊齋重趼達吾鄞以茂滋在鄞囚中也乃與汝都督應元陸處士宇燦等百計出之祝髮以返里門則無家可歸矣正旁皇里社間而閩師入江樵蘇四出菊齋大爲所窘張侍郎煌言識之乃脫于難因是居太倉以岐黃之術自給其道大行或戲之曰先生邁疾久今乃能治疾耶菊齋天性誠篤跬步不敢違禮對妻子如嚴賓事親死生不懈其子姓以至僕隸無不化之言

語煦煦令人不飲自醉寓居陸氏湖樓中湖上人無大小皆呼之曰宋先生而歸莊亦起兵不遂放浪湖海終稱完節時以爲錢門二傑云

張公孫寓觀日堂

張閣部肯堂之孫茂滋出獄而病寓陸氏觀日堂著餘生錄其全帙載于續耆舊集陸春明傳後

跋張茂滋餘生錄

鮎埼亭集

鯢淵先生殉難闔門二十七人同盡獨公冢孫茂滋以遺命保宗祀逃出道隆觀中行之中途仍被俘囚于鄞獄鄞之義士陸宇燦董守諭董德偁百計出之未能得公之故將汝應元故客宋龍輔之亦未得大名人蕭伯闇閩人劉鳳荔皆公

四明談助

卷六

兩

舊所取士適俱在鄞共爲言于當事乃免茂滋既出而病館于陸氏觀日堂中幾死病中著餘生錄且萬言其述俘囚中困厄令人不能卒讀文境固真亦筆力足以達之時尚未冠乃知茂滋真奇才也病愈蛟川義士范兆芝送之歸華亭應元爲經紀其家乃未幾而茂滋卒蘭摧玉折臯陶不祀可哀也已今予家尚有茂滋手書餘生錄稿及蒙難紀言原本每一展開輒爲泫然

句餘土音擬薤露詞

雪交亭

汝都督出家

相公所完老奴所薙相公自是文謝流老奴欲爲嬰杵計竇稱菴裡禱空王孤忠一綫憑利濟雪交亭夜雨殘觀日堂餘

生還老奴所薙相公所完

詩話汝都督應元張相國之元隨也積功至御旗牌總兵官相國自知必死托孤焉都督唯唯一日忽失所在則往補陀爲僧矣及翁洲破而都督百方脫相國之孫茂滋子死不負其言

孤孫豈望存

張公孫病獄

先公闔門死孤孫豈望存祇緣先公意將以延家門百死幸不死乃爲二豎昏痛猶未及定重復消其魂輿尸壓我首膏斧縛我身圍城萬礮石雙耳不可捫新朝新獄吏固應分外尊先公在箕尾何以援孤孫

詩話鯢淵張公之孫滋茂也詳見茂滋所作餘生錄

四明談助

卷六

七

尚書橋

賀秘監祠西橋今名尚書橋祠東昇平橋今名館駟橋俱宋天禧五年僧蘊臻建運使陳堯佐題名爲憧憧東橋憧憧西橋嘉祐間守錢君倚修乾道五年守張津重建橋成而屋之翼以石欄簷楹飛舞與波上下壯麗堅緻可支百世誠一郡之偉觀也侍御王伯庠爲記後亭廢西橋改名澄清橋明天順八年守張瓚爲刑部尚書陸瑜立坊改今名俱見敬止錄

尚書坊

在尚書橋下正對聖功寺巷自明成化初至今歷三百三十餘年坊已全傾其後人以四石柱爲基以上易爲木坊煥然一新亦不失爲賢子孫也

聖功寺

聖功院本崇教院周顯德元年建宋眞宗詔內侍裴愈訪名山聖迹寺院以藏太宗石刻御書至道初本院奉賜御書五十卷軸復奏改賜今額寶慶志聖功寺巷今稱尙書橋巷寺已廢爲民居有石甃方池其故蹟聞志寺基在烟嶼北盡處東爲宋楊侍郎宅南爲大坂田西瀕河河外爲湖市卽今前營教場北亦河河外爲雪汀有能仁觀音寺昔有觀音寺橋今其河已塞語見謝山十洲志

萬氏寓居

萬氏自都督府封爲提署箭廳其後人徙居管村白雲莊後又徙居湖西在今大尚書橋下之北卽宋時楊侍郎宅南隔一巷與全氏爲鄰以橋下有石坊四柱故昔人有誤稱爲崇讓里坊者康熙中充宗遷于杭至乾隆初季野管村復自湖西遷居小教場後

湖社罷劇

林繡菴御史自喪亂以後遺老盡亡公獨年逾大耋幅巾深衣躑躅行吟莫可與語于是悒悒彌甚乃令小胥舁籃輿徧行坊市遇有場演劇輒駐視之一日至湖上聖功寺巷公眼已花不辨場上所演何曲但見有冕旒而前者或曰此流賊破京師也公卽狂號自籃輿撞下踣地暈絕流血滿面觀者迸散是日爲之罷劇嗣後公不復出掩關咄咄而已鉅埼亭集記逸

謝御史第

御史謝升所居在扒沙巷前營守備署卽其宅謝氏先代居
慈谿青林鄉伯昌始遷郡城生升官御史四傳庠生瑜生九
臯九臯生一爵禮部儒士以子三賓貴贈通議大夫

謝御史升

永樂己丑進士官監察御史

鄞獻表

後人有名均者字際運

熟于時文乾隆癸卯歲貢病口吃人稱長者然遇不平事
無不奮身出力居貼守備營署族中有在營者一日餓後
喧鬧守備捕去欲鞭之際運急往爭論守備欺其瘦弱書
生反以夏楚作威際運卽將夏楚奪來向守備頭上連撲
兩下擲之而去守備亦無如何一時傳為快事子鈞諸生

四明談助

卷六

七

能紹家學

知縣謝柔

隆慶庚午舉人真定府衡水縣知縣

鄞獻表

太僕三賓行人

于宣提學于道傳俱見各新第下

吳山人居湖上

吳山人笨子居湖上在陸侍御宅之南其題涵虛閣詩云莫
惜倚闌同嘯傲題詩王翰在南鄰

吳山人士瑋字潛玉號曰笨子為諸生數試不利遂挾其詩
客都下足跡徧吳粵豫楚間過文江時鄒南臯先生方歸里
門笨子上詩有日到來天地傷多事歸去江湖尚有人一時
誦之鄒先生為叙其詩草曰文江詩選笨子老客溫陵食荔

支酣甚數日中作詩百首名曰荔品百咏聞其有菊品百咏
苦覓不得見客有過余論詩者曰先生甚喜笨子詩何句最
佳余謂笨子詩如曰身老喚人看國色此語意極佳亦極可
歎余近來看年少中文字自顧衰老不能揚聲輒呼諸名士
讀之坐上有名酒以病欲飲不得使吾友盡觴望高崖峭壁
患氣不能上促同遊健者造其勝俱與笨子同此懷也笨子
又曰寶刀出土懸空壁老馬隨人看種田詞義亦極慷慨上
耆舊傳

湖上全氏

全氏遷于城中之湖上者名文瑜上距遷桓溪之世爲十六
傳文瑜生政以篤學懿行稱人師起家明經司教常熟以子

四明談助

卷六

吳

侍郎元立貴封檢討侍郎則謝山先生之六世祖也自宋侍

御權至先生爲世凡二十四云

門下董秉純撰全氏世譜

侍郎建第于新街列傳宜載新街第下後宮詹公移居湖
西陸尙書第謝山太史祖父亦寄居新第中故世系列傳
俱詳于此以便彙觀

工部侍郎全公元立

字汝德號九山嘉靖乙未進士充庶吉士歷官修撰冊封
魯藩例有厚餽公却不受王重之爲手題九山圖相贈曰
此可無玷太史裝也時相嵩方當軸傾首相夏公及楊沈
諸君相繼赴西市舉朝寃之莫敢言公憤然曰使吾職臺
諫當以言爭職廷尉當以法爭吾職史獨有董氏筆在耳

因作告天文極陳諸公寃狀詞義慷慨嵩聞之怒甚改南太常寺卿再遷南工部右侍郎會歲旱兩都大臣俱自劾相嵩從中持之遂聽公乞歸公性至孝歸時髮且斑白益嚴事太夫人值太夫人病自秋涉春不緩帶居喪柴立竟以積毀卒年六十八生平無他嗜好庖屋數椽與伯仲皓首同居性耿直初在史館嘗典教內侍有過輒撻之後公之孫天叙入館復教內侍有老璫來語知為公孫搖首曰當日全先生太嚴其見憚若此耆舊傳侍郎長子宗人公少愚次子和州公少微傳見新街第

禮部侍郎全公天叙

字伯典又字元洲號鐵菴少司空元立孫也萬歷丙戌進

四明談助

卷六

三五

士官編修皇長子出閣充日講官公詞旨朗暢習為北音睿聽曉然直講筵五載兢慎不懈已而丁外艱極盡哀禮服除補官陞少詹事兼侍讀學士以母楊太夫人在京邸不習苦寒乃乞報慶差奉母抵家徙居月湖之濱承歡為樂約鄉先生為真率會值察典為臺省所劾改官留都卒天啓改元贈禮部右侍郎祭葬蔭子報青宮講傅也所著

鐵菴集

聞志

林泉雅會圖石本跋

鮎埼亭集

是會劄于先宮詹公

天叙

其同事者周尚書

應賓

吳光祿

禮嘉

林

僉事

祖述

陳宮允

之龍

丁中丞

繼嗣

周觀察

應治

黃比部

景莪

屠辰州

本體趙比部

仁體十人辰州為社長然未有圖也宮詹下世宮

允辰州及黃比部俱相繼逝于是又添以徐時世陸科二廷尉萬都督非陸別駕舉周侍御昌復為十人始為圖有墨本又有石本其後光祿下世又忝以施都督翰然石本中尚無施公以其未入社也臬堂記之未詳

林泉雅會圖跋二

吳公太白以論國本罷御史光宗卽位起副尚寶已而長鴻臚又副大理乃以光祿卿致仕予曾于周文穆公家見其所序公歷仕宦簿如此天啓三年林泉詩社勒石公年八十為席長而臬堂以為泰昌改元公已卒贈光祿可謂紕繆之甚者今鄞志皆本之向非石本之存何以訂此譌乎

四明談助

卷六

四

林泉雅會圖跋三

是會以先宮詹公經始其後繪圖上石宮詹久已下世而以漢隸題四大字于卷首者宮詹從弟泰徵先生天麟也先宗正公之次子是時吾家諸祖多工書先生以漢隸名先和州之叔子思若先生諱天駿以行書名宮詹次子非堂先生諱大震以草書名先應山公次子務觀先生諱大科以行書名而非堂于各體皆工今多散佚

全太學天麟

字靈明又字泰徵宗正公之次子宮詹公從弟工隸書湖上林泉雅會皆鄉老其以布衣豫之者汪長文與先生其後管无棘亦參之

續耆舊傳

全舍人大訓

字懋欽少宗伯天叙之子也以門資官中書舍人其詩華綺有宗伯遺風耆舊傳

非堂全先生大震

字二何少宗伯次子也少負異才治詩古文詞精書法身既貴公子性任誕墀于陽羨吳氏故巨富資妝數萬金隨手而盡里中陸大行文虎最持標格獨心折先生與通婚姻既七試不利家日貧落托因作客長安中久無所遇益放浪江湖不可一世嘗客白下時南都初立莊漢曉官太常先生數造其門太常必設食以待將徹先生出袖中油楮裹其殘炙去率如是後竟客死故人家識者哀之所著

四明談助

卷六

四

有東皇集

用上耆舊傳

先生初入京其上世門舊尚多顧心非韓

退之上書求售不肯自通長安米貴始大困吳尚書生白李尚書稽仲江翰林柱北皆少吹噓之于是施相國存梅招之東閣是時奄人方盛相國依阿奉命而已先生乃謂之曰閣下當有以制權璫而顧為權璫制乎竊為閣下危之相國以是不喜待之驟衰先生遂不復往周御史昌晉陳御史朝輔皆待先生厚然先生以其附奄也累斥之子是累試順天皆不售已而朝政一新先生大喜有極陳時政疏將投匭會亦有不嫌于中者歎曰尚非其時也拂衣南歸自是不復入京關西許次龍者亦豪士贈先生詩有曰橫犀貫玉高車馬不見厰臣並陛下如今天子忽異常

開口要進虞與唐聞君萬言書滿紙草成不上果何以抱
璞荆山每見擯折弩千鈞羞再進紀其實也

鮒埼亭集補傳

全徵士大和

字介如一字子石號他山應山公長子崇禎中以薦舉入
京見時事日非不求仕而歸三子俱卒無嗣以贈公書爲
後謝山之父也

黃冠一老全太常大程

字式躬一字襄孫應山公第三子諸生乙酉江上出師太
常莊公邀與城守軍事薦授尚寶司丞事畢復叅瓜里幕
府丙戌正月遷太常寺丞以所言不用投劾東歸航海之
役追扈不及棄家逃入東錢湖窮山中然尚與董公幼安輩

四明談助

卷六

四

通消息戊子幾罹五君子之難辛卯而後屏絕人世城居
爲卒伍所踞家業蕩盡不問也躬耕山田十畝以餬口丁
酉頗以不得已事至禾中恐衣裳爲關津所訝乃以黃冠
行然終悔之曰豈以道人而尚走風塵者自是不復下山
又十年爲丁未病卒得年六十公自遭國變後始爲詩然
每年不過十數首或一二首甚至竟歲不作一字癸卯滇
緬信至又哭從子遂絕筆故所存薄杜吟一卷不滿百首
從未嘗出以示人要其生平之大畧畢見于此不得僅以
詩目之殘明遺老託于緇衣者多其託于黃冠者獨常熟
鄧先生大臨吾鄉則公而已故特署曰黃冠一老亦以補
吾鄉人表之闕也

續耆舊傳

太常爲元洲學士之從子謝山曾

祖也其詠南都詩可補正史之闕今錄數首于後

白下擁立事勢岌岌乃日聞翻三案起大獄如醉如狂而欲為晉宋之偏安不可得矣追維神廟以來黨禍之起實由國本豈知明祚終應覆于福邸之後言之可為長慟然近日吾友巢端明來鄞曰赧王非福邸之後更屬異聞高廟應不容矣

神考真神鑒先知屬聖昌四朝終有待三案與偕亡凶德竟參會偽言日穉狂更傳龍種偽不獨一王郎謂土之明也

來給事習之為予言南都事急太后日遣人候馬士英母房氏蓋欲托命焉恐其委而去之也及士英奉太后至浙浙之縉紳入朝頗疑太后非真或曰即士英母也

四明談助

卷六

墨

士英從杭入越所謂太后不知作何安置自來史冊所未有也

赫赫傳房母慈寧日起居三宮命有託半壁事何如天子

徑安在老身任所徂西陵拜車駕疑案重獻獻熊給事汝霖入朝太

后問以至上安在嘿然不答士英亦然

附林丈蘭菴書

蕭晨接讀尊詩不覺失聲而哭是時太后自河北來赧王不迎羣臣奉輦至殿下輿乃掖后至殿隅密語移時秘莫能問已而始下拜慟哭羣臣疑之大理喬先生聖任在班目擊以語人者或曰赧王實故福藩審理貌類世子遂冒認語時戒太后勿洩同享富貴也事雖不可知然來既不

出迎踰時始拜哭奔又不同行良屬怪事固當與王之明
童妃二案並訝千古而尊詩足備遺史一則無疑也

潞王儒雅恭謹則有之然漫無骨力乙酉六月之難杭
人請王監國熊給事願身帥羅木營兵背城一決不濟
則死之潞王涕泣不肯其人可知已

風流潞國主宿昔繫民望定策空遭忌鳴琴辨早亡麾軍
散羅卜稽首獻錢塘若使果當璧將母類赧王

潞邸
工琴

太常邸中論史奉呈大卿莊丈漢老

偶與漢老論史予謂千古神功大禹而下漢之武皇唐
之文皇是矣漢老曰何謂也予曰三代以來稱中外者
必曰中夏以臨外蕃則以弼成五服之功也秦吉了小

鳥耳尙曰吾爲漢禽則以武皇開邊之功也東西洋至
今稱天朝必曰大唐則以文皇東征西討之功也漢老
笑曰是則然矣然論山河兩戒者必以吾越與胡對舉
稱南戒焉將毋吾越能成安攘之功比隆于此三代歟
同座者皆爲之軒渠退紀以詩未知諸公能與小朝廷
吐氣否也

勲華雖大聖未及分地維高密定五服中外始各釐赫赫
懷明德要荒莫敢欺苟渝此盟者天地共殛之萬古曰有
夏鼎遷號不移曾聞入裸國四載無留遺元圭所區畫昭
哉如列棋東樓何不肖反甘變于夷下喬而遷幽皇祖所
累歎

赤帝傳五葉其雄跨百代感懷平城恥觀兵窮絕塞幕南
無王庭天驕爲膽碎乃馴致宣元呼號伏殿陛咄嗟彼腐
兒欲以黷武諛當年非百戰封胡且日汰所有易所無漫
書豈可耐功不在禹下人方知漢大聲靈及小鳥亦復知
地界漢禽尚如此漢人請自愛

咄嗟小秦王足爲萬古英頡利亦雄兒匍匐繫長纓以次
及諸部一一誓天兵豈徒幹父蠱遠洗六朝腥高歌破陳
樂褒鄂同和鳴所以東西海至今猶魂驚呼我曰大唐用
以警不庭羯奴縱倡亂花門亦何成切莫希非望郭李正
中興

惟十二侯表其末乃於越豈知少康裔大有沼吳術究竟

四明談助

卷六

星

霸中原牛女光突兀其後亡秦者亦自此邦出風胡有遺
劍百世不可誦所以畫野者兩戒必指屈南鎮何峨峨東
江何勃勃有君方臥薪有臣共泣血六千君子徒渡江已
刻日數請占玉門義無忘石室

南中信至

跋扈窮荒種多年已不庭如何褻車駕藉以寄聲靈誰爲
子冢子泥中孟浪行

聞道申胥哭淒涼古刺墻

相傳晉王遣人乞師古刺

亶洲有故事強半

是荒唐

前此浙人三乞師日本不得

十年烟瘴裡狗脚足傷心幾度遭神祐寧期竟陸沉需郊
占出穴中夜哭平林

譌言日聞心膽俱喪而此間又有海上降卒之禍大索諸故家猶子閑亦豫焉念先兄非堂先生以乙酉不肯削髮野死曾有挽詩今失去矣閑也不媿其父然門戶之恫何能自己况重以天末之凶問乎

世事已如此吾曹合息機猶愁游虎落何處掩荆扉故國遺民盡衰門空照微

先兄晚號空照居士

應憐汝癡叔殘喘亦幾希

全隱君大鏞

字聲遠一字碩人和州公孫也盛德篤行亦西明山人邵雲客一輩人所著有綠漪窻詩草

續耆舊傳

全隱君美楠

字寤墨宮詹公天叙之孫舍人大訓長子也風節極高于

四明談助

卷六

吳

書無所不讀亂後杜門以窮愁卒

續耆舊傳

全儀部笑章

字木千晚年號穆翁宮詹公之孫舍人公次子也宮詹公家貧甚故先生雖世胄蕭然如儒素獨與兄弟講學以名節自勵熟于漢唐紀傳背誦如流王節愍公令鄞深器之張督師蒼水為諸生放誕不羈呼盧狂聚極日夜自其父兄以至師友皆拒之獨先生一見曰斯異人也乃盡賣負郭田三百金為償其負而勸以折節改行督師稍歛其芒角以女妻先生仲子已而江上大亂先生馳驅其間授禮部主事事既不克幅巾歸里而督師以蒼頭異軍累蹶累起崛強山海遂為大朝所指目先生買屋于黃巖將以

密置督師之家未發而其眷屬已被錄乃遣仲子挈婦往避地焉先生自是遂目盲一無所見掩關靜坐臨終書末命曰吾未得爲蒼水延一綫汝曹當世奉其祀子三其仲子爲督師壻者遂居黃巖先生卒後葬于東湖祖墓旁所著有菘窻集續耆舊傳

全侍御美閑

字吾衛號葦翁宮詹公孫非堂公子也非堂善書以餘技作繪事侍御之書亞于非堂而畫馬獨入神品侍御生而不凡既承家學又爲陸大行文虎之壻追隨婦翁以名節自勵高冠長劍峻峻諤諤雖一貧如洗勿恤國難既作從戎江上累授侍御監軍已而東歸有大將來據宮詹宅爲

馬廐侍御憤甚中夜焚其廳事由是日鬱鬱侍御畫馬其藍本實出松雪之遺至是諱之或有不知而及之者則叱曰吾所師者宋遺民龔聖予父子之馬爾旣不知其莫視吾畫嗣是遂秘不示人其時甬上多畸士陸副使字爍楊職方文琮李都事振玘慈水則魏山人耕皆與侍御相晨夕終歲奔走山海間思然故國之灰壬寅除夕刊章名捕諸畸士皆豫焉次年送禁省獄中五月八日聞將庭訊侍御仰天歎曰吾不可辱是夕暴卒葬于非堂先生墓旁陸孺人最孝非堂晚景甚困病後思酒不得孺人以女紅易佳醞日進之每侍御畫馬孺人從傍爲布景自其家被籍所著百尺西樓集無存者而所畫亦希長子宗然亦有志

節陸大行環堵集散失搜訪存之終身不求聞達無後

鮑

亭集
外編

全贈公吾騏

字聿青一字北空太常大程長子乙酉六月太常在錢莊
二公幕府贈公年十七從行議赴都堂授官力辭已而事
去絕意進取太常避兵東錢湖東丁亥王評事與施杜管
江之師頗相消息未幾大兵四合王評事出走投太常家
太常他出贈公請評事伏山房中以觀變評事欲赴海上
一飯遽去中途被執太常思舊館詩有云早能聽孺子或
得脫蘆中蓋謂此事也事定反城中居已爲兵所踞并藏
書無一存者太常悒悒以卒贈公東遷西徙然不肯妄交

四明談助

卷六

四

一人以是窮益甚王常博水功欲葬楊推官兄弟骨而不
克石門曹太僕遠思成其志贈公爲襄其事既畢而爲文
哭告于常博之墓思舊館八子柳堂最喜燕樂有承平王
孫之風而贈公以清苦不求人知卽以所存詩觀之並足
以想見其人矣著有聽濤樓集

續者
舊傳

他山公避地記

鮑琦亭集

丙戌以後甬勾東之人遠在天末成化最晚其在世祿家
子弟尤爲甚焉而全氏一日棄諸生者二十四人他山公
大和與其弟式公先生大程議以東錢湖之東最稱荒僻
且有田十畝在童叟可避地焉謂子北空先生吾騏曰汝
能絕意人世乎答曰謹受命遂披野服隨二父入山一門

共修汝社力耕之餘清吟而已高先生隱學嘗歎曰謝臯羽棄其子行遯終身不相聞問鄭所南則無子未若全氏之駢聚也而家業自蕩然城中里第爲營將所踞圖書法物一無存者所有春雲軒池沼廢爲馬廐乃自以爲入山已深而杜輿起兵管江搆禍山中犬牙交錯血瀑腥嵐風鶴之警日至雞犬俱遭物色寨長土團雜沓來過雖邀天幸卒得免禍而危機已徧歷矣辛卯以後他山兄弟相繼逝世北空先生舉二子至伯子旣長始返城居得一椽于宮詹公第中湖上有不波航者陸氏之詩樓也北空先生與李昭武輩遊其上日唱酬焉望之者皆知爲咸淳以上人也

句餘土音賦湖上舊居故蹟

五桂堂

詩話先宮詹五桂堂以泰宸翰菘窻則燕居之室也

五桂堂前桂雲光五色寒恩多從鶴禁畫尙記龍翰錦里圖書散菘窻竹石殘鳳毛零落在珍重世綸看

百尺西樓

詩話先監軍善畫馬師趙承旨國難後惡承旨之仕元諱其淵源自言學龔聖予以聖予有高節也

端公畫馬處湖海氣英英恨絕鷗波叟覩焉燕市行別傳神駿骨長作不平鳴教魄還難泯登樓百感生

雙韭山房藏書記

鮎埼亭集

予家自先侍郎公藏書大半鈔之城西豐氏其直永陵講筵賜書亦多所稱阿育王山房藏本者也侍郎身後書卷法物玩器多歸于宗人公之手以其爲長子也先和州公僅得其十之一而宗人子孫最無聊再傳後盡以遺書爲故紙權其斤兩而賣之雖先集亦與焉遂蕩然無一存者先宮詹公平淡齋亦多書其諸孫各分而有之遂難復集和州春雲軒之書一傳爲先應山公再傳爲先曾王父兄弟日積月累幾復阿育王山房之舊而國難作盡室避之山中藏書多難挈以行留貯里第則爲營將所踞方突入時見有巨庫以爲貨也發視則皆古書大怒付之一炬于是予家遂無書難定先贈公授徒山中稍稍以束修之入購書其力未能購者或手鈔之吾鄉諸世家遭喪亂後書籤無不散亡祇范氏天一閣幸存無恙而吾家以三世研田之力得復擁五萬卷之儲胥其亦幸矣雙韭山房者亦先侍郎之別業在大雷諸峯中今已摧毀而先贈公取以顏其齋者也自予出遊頗復鈔之諸藏書家漸有增益而于館中見永樂大典萬冊驚喜欲于其中鈔所未見之書吾友馬嶰谷趙谷林皆許以貲爲助所鈔僅數種而予左降出館矣昔鄭漁仲修通志欲于館中借書卒不果良會之難洵可惜也爰輯目前所有之部居而爲之記

又記附

揚州馬嶰谷半查兄弟有玲瓏山館園亭明瑟而巋然

高出者藁書樓也迭疊十餘萬卷嶰谷于樓上兩頭各置一案以丹鉛爲賞確珠簾十里不至夜分不息而雙燈炯炯時聞雜誦樓下過者多竊笑之以故其家精核更無譌本仁和趙谷林意林兄弟有小山堂藏書多得之江南儲藏諸家獨于山陰祁氏淡生堂諸本則別貯之以其太君朱氏祁氏之所自出不忘外家也雙韭山房舊有宋槧四明寶慶開慶二志爲人所竊歸於有力者之手谷林聞之亟以兼金四十錠贖之其好蓄異書每如此永樂大典明成祖勅胡廣解縉王洪等纂修以姚廣孝監其事計二萬二千七百七十七卷凡例目錄六十卷冠以御製文序定爲萬二千册嘉靖四十一年

禁中失火世宗亟命救出此書幸未被焚遂詔閣臣徐階照式撫鈔一部至今正本尚在 乾清宮中副本移貯翰林院其例乃用洪武四聲韻分部以一字爲綱卽取十三經廿一史諸子百家無不類而列之所謂因韻以統字因字以繫事者也又皆直取全文未嘗擅減片語嘗聞諸儒商權凡例初多參辰王傅笑曰欲構層樓華屋乃計功于箍桶都料匠則凡例蓋取傅手也

全贈公書

字吟園以經術詩詞教授里中最精考索重修全氏宗譜贈公二子長祖謙生而慧甚四歲入家塾一年卽能畧通諸經章句蔣蓼厓先生嘆曰此聖童也一日戲以小刀剪

紙傷其指感風而病臨危于案上大書鯉也死三字而破
之曰聖人之不得有其子聖人之不幸也時年六歲全氏世譜
次卽謝山先生傳見後

翰林全謝山先生祖望

先生字紹衣四歲入塾卽粗解章句十四補諸生窮周禮
田賦之數積筭累日夜遂病父友萬授一謂之曰子年尚
少能徐通諸家疏解何患不了然其舅蔣蓼厓先生亦謂
之曰治經不止經生家言吾嘗親承何義門之說矣如周
易中象數緯候諸家皆分得其一支經生以爲支離黜之
實自文其陋耳三禮則當參以史傳然後知古今異同及
因時損益之故其餘文集說部一二獨得之語轉爲說經

家之所未及皆在所酌取吾老矣姑述所聞以待子之深
造自得由是益務廣覽是時陸氏南軒陳氏雲在樓藏書
尚未散徧讀之猶以爲未足復登范氏天一閣搜閱其秘
本年二十游武林復就趙氏小山堂借所未見書督學王
公蘭生極賞之以選貢入成均入都謁侍郎方望溪菴與
論喪禮方大器重之舉順天鄉試閣學李穆堂級見其所
答策親過其寓齋劇談竟日出曰此深寧東發以後一人
也李邸第在宣武門南爲合肥故相居有紫藤合圍花時
濃陰蔽日割其西偏使居之東偏則以居南昌萬孺廬承
蒼每日高春就紫藤軒下促席或論學或徵据經史慈湯
麥飯互爲主賓穆堂笑曰此楊誠齋所謂三三徑也乾隆

元年成進士選庶吉士是年試詞科先生已應薦以先入館例不預試次年散館補外遂歸爲人負氣初入都中途資斧竭一族人在山東按察幕往貸之設宴極豐問其故曰主人雅聞君名但修一刺稱門下當厚相贈立辭去晚年兩廣總督延主端溪書院將特疏薦之因語諸生曰是以說經爲媒也託疾辭歸生平留意鄉邦文獻以李杲堂所葺甬上耆舊詩止于明萬歷間乃廣爲蒐輯人各立傳別白品格不少假借又嘗輯宋元儒學案以補餘姚黃氏之所未及性喜雌黃人物與人多忤後作金峩山晚楊梅賦云惟漸底于和平尚予人以可受蓋晚歲所造深矣卒年五十一學者稱謝山先生

錢志采年譜

先生有兄祖謙六歲而

塲太夫人哭之哀忽張目曰勿哀吾當再來補之後十年生先生亦慧甚故小字曰補又有傳先生爲錢忠介公轉生者其詳未之聞集中有五月十三舉子詩三首其第二首曰釋子語輪迴聞之輒加嗔有客妄附會謂我具夙根琅江老督相于我乃前身一笑妄應之燕說漫云云昨聞正氣堂豫告將雛辰在我終弗信傳之頗驚人聊以充談助用語湯餅寶按先生三十九始得子昭德方舉時忠介後人苟庭入賀先生曰何知之神也苟庭曰夜來寒家影堂中不知何人揚言曰謝山得子可喜可喜故來訊耳亦

一奇也

年譜

謝山先生自京師歸嘗爲真率之會同社者陳南阜錢苟

庭李甘谷胡君山董鈍軒杯盤一旬再舉而倡和則無虛
日後又益以范緘翁董逸田李海若張月性徐洪度董映

泉董梅困而史雪汀間與焉句餘土音附記

謝山先生著述書目

經史問答十卷 七校水經注 公車徵士錄 增定黃

氏宋儒學案 鮎埼亭集五十卷 鮎埼亭集外編五十

八卷 甬上續耆舊集八十卷 甬上前後族望表 虬

骨集抄 祥琴集 秋江行集 七峯草堂唱和集 邗

江唱和第二集 吳山消夏集 漫興集 望歲集 采

叢齋集 度嶺集 句餘土音六卷